

**ASO GAFUA, 28 IANUARI 2019**

*Na nofoia e le Fofoga Fetalai le Nofoa i le itula e 9:07 i le taeao.*

Tatalo.

**FOFOGA FETALAI:** Ou te faasilasila atu ua toe amatalia nei Taulumaga a le Fono Aoaofa Faitulafono.

Ia, ua malo le soifua, ua malo foi le lagi e mama ma le tauatai i lenei taeao fou, faamoemoe i le Atua ina ia faapena ona maua le malosia e faaauau ai le tatou galuega i le amataga o lenei vaiaso fou.

E tolopo galuega a le Fono Aoaofa i le Aso Fono i le Aso Faraile 25 Ianuari 2019, ua oo i le iloiloaga auiliili.

**TULAFONO TAU FAAOFI O TEUTEUGA O LE TULAFONO MO LE SOIFUA MALOLOINA 2019 - iloiloaga auiliili**

**FOFOGA FETALAI:** E tusa ai ma Tulafono Tumau, e amata le iloiloaga auiliili i le Fuaiupu 2.

**FUAIUPU 2:** Ua teuteuina le fuaiupu 2.

*Faamaonia.*

**FUAIUPU 3:** Ua suia le fuaiupu 5.

*Faamaonia.*

**FUAIUPU 4:** Ua teuteuina le fuaiupu 8.

*Faamaonia.*

**FUAIUPU 5:** Ua suia le Vaega 4.

*Faamaonia.*

## **FUAIUPU 6: Ua teuteuina le fuaiupu 19.**

**FOFOGA FETALAI:** Se i tulai mai le sui usufono mo Palauli le Falefa.

**Afioga Hon FAUMUINA TIATIA FAAOLATANE LIUGA (Palauli le Falefa):** Lau Afioga i le Fofoga Fetalai, sa ou taua le vaega lea i lau lauga faalauaitetele e uiga i lenei Tulafono Tau Faaofi. Mo le silafia e le Maota, o le vaega lea o le Tulafono e faatulai mai nei i le teuteuga o le Vaega 19, o le Vaega 19 na... e 61 Tulafono na soloia ai fuaiupu ia ina ua finagalo le Malo e faamatuu atu matafaioi nei i lalo o le Matagaluega o Tupe, o le Matagaluega mo Tupe Maua, faapea le Matagaluega mo Pisinisi, Alamanuia ma Leipa. O le vaega la lea, e 61 Tulafono sa suia ai, e aofia ai ma Tulafono e lua i lalo o le vaega lea o auunaga Faa-Soifua maloloina ma le Matagaluega o le Soifua Maloloina. O lea la ua faatu mai e soloia le Vaega 4 o le Tulafono, ua uma ona soloia ato lava.

Lau Afioga i le Fofoga Fetalai, ou te faatu ai le lafo, *Ina ia faautagia le soloia lea na soloia ai aua o lea ua i lalo o le Matagaluega o Tupe, Matagaluega mo Tupe Maua ma le Matagaluega, ua faasee ese ai le Minisita mai matafaioi ia ae tuu atu i Matagaluega ia e tolu, ona toe foi ai lea o le fautuuga i totonu o le Kapeneta e fai ai le faaiuga mulimuli. Ma lou faaaloalo lava lau Afioga.*

**FOFOGA FETALAI:** E i ai se isi sui usufono mo le faasaoina o le tulai atu o le Minisita?

Ia ou te tapa lau Afioga i le Minisita mo sou finagalo i finagalo e pei ona faaalua i le teuteuga o le Fuaiupu 19.

**Afioga Hon TUITAMA TALALELEI TUITAMA:** Faafetai mo le faafesili. O le vaega lea ua uma ona ou talanoa i ai i le tatou Attorney General. O le faamalamalamaga lea na oo mai ia te au, o lea ua aveese le Fuaiupu 4 ona o lea e aafia ai le NHS. O le 1, 2 ma le 3 ua faasaoina ona o lea e aumai ai tau faaee atu e aofia ai ma regulations, lea la e tataua ona i ai i totonu o le Tulafono lea o le 2006, Ministry of Health Act 2006 lea o lo o faavae ai le tulaga lea lau Afioga.

Ia o le faamalamalamaga lea na tuuina mai e le Attorney General.

**FOFOGA FETALAI:** Se i toe tuu atu lava le avanoa mulimuli lea i le sui usufono mo Palauli le Falefa.

**Afioga Hon FAUMUINA TIATIA FAAOLATANE LIUGA:** Faafetai i lau Afioga i le Fofoga Fetalai, faafetai foi i lau Afioga i le Minisita e tusa o lea ua feteenai lava mea ia e lua. Afai ua finagalo le Kapeneta e tuu atu le responsibility i le Board of Revenue, o le a le mea o le a toe faapalapala ai le Afioga i le Minisita? O lona uiga o le a ese le Tulafono lea ese le Tulafono a isi Ministry. E 61 Tulafono a Matagaluega ma Faalapotopotoga na soloia ai le mataupu lea, ina ia see atu le responsibility ina ia tasi le itutino o le Malo e feagai ma le coordination. Aua o le mea lea o lea e toulua solo ai le faiga o mea ia o tau faaee atu ona e tofua lava le Matagaluega ma le Faalapotopotoga ma le

latou faiga faavae, ona uma ae lea, ua leiloa po o ai la e responsible, ae sili ona tuu i lalo o itutino ia e tolu, ina ia ogatasi ma faiga faavae a le Malo. Ma lou faaaloalo lava.

**FOFOGA FETALAI:** Malo faafetai. Ia se i tulai mai lava le Afioga i le Palemia.

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI (Palemia):** Lau Afioga i le Fofoga Fetalai, e le aveesea lava le tiute tauave lea o le Revenue Board, tusa o le Komiti lea e toe iloiloia ni fua togipau pe a faapea e faatulai mai e se Matagaluega po o se Faalapotopotoga foi, ae manaomia ai ni toe teuteuga o malosi faapena. E faapea lava le tulaga o le tatou Malo, o la e i ai lava le avanoa e fai foi e isi Faalapotopotoga, ae i ai lava foi le taimi o le Revenue Board e tilotilo pea i ai, a i ai lava so latou taofi e tatau ona faaalua so latou finagalo, e le taofia le mea lena, o lea lava o lo o i ai le tofa fetalai, le flexibility e mafai ai lava ona faatino galuega a le Revenue Board e pei ona laga e le Minisita. A o le Tulafono lea sa faatuina i le 1988 agai mai i le 1989 i lou taimi, o la e i ai lava le flexibility lena.

**FOFOGA FETALAI:** Malo faafetai. Ua ou manatu ua manino le folasaga a le Malo, e aoga foi le saunoaga a le sui usufono mo Palauli le Falefa e faamanino atili ai le fuafuaga e pei ona faataatia i ai e le Malo le teuteuga o lenei Tulafono.

**FUAIUPU 6: Ua avea le fuaiupu 6 ma vaega o le Tulafono**

*Faamaonia.*

**FUAIUPU 7: Ua faaofiina le fuaiupu 21A fou.**

*Faamaonia.*

**FUAIUPU 8: Ua teuteuina le fuaiupu 24.**

*Faamaonia.*

**FUAIUPU 9: Ua faaofiina le fuaiupu 28 fou.**

**FOFOGA FETALAI:** Tulai mai le sui usufono mo Faleata Sisifo.

**Tofa LEALAILEPULE RIMONI AIAFI (Faleata i Sisifo):** Lau Afioga i le Fofoga Fetalai, faamolemole ma le ava tele, muamua faafetai mo le suiga o le toe faafoi o le igoa o le Director General of Health, o mea e tatau ona toe faafoi ina ia atagia ai le tulaga talafeagai o le igoa, designation, ma avanoa faapea i isi vaega o le lalolagi.

Ae fia fesili lava i le Vaega lea 9(3)(c) lea e faapea mai ai; nisi o tomai ma agavaa e pei ona faamaonia e le Minisita, o le a tonu?... ona e pei e atagia ai...o le laugatasia o Tulafono faapenei a Matagaluega taitasi, a o lea pei ua ese mai le Tulafono lea. E le afaina... a o le mea lea ou te fesili ai, po o le Minisita?, mo le puipuiga o le Minisita. Aua foi o aiaiga o avanoa nei o lo o i ai lava mea ua uma ona faataatia. Ia manatua foi la, o le Minisita e fautua e le Pule Sili, o Minisita foi o tulaga lava ia o Minisita pei ona silafia e fai ma sui sui. E pei o le tulaga lena lea ou te fia faafesili atu ai i le vaega lea o le Tulafono po o se vaega fou lea ua fai pe a sailia Ofisa Sili o Pulega o Matagaluega. Ma le faaaloalo lava. Faafetai.

**FOFOGA FETALAI:** Malo faafetai. E i ai se isi fesili, a leai o le a tapa le Afioga i le Minisita mo le toe faapupulaina o lea mataupu?

**Afioga Hon TUITAMA TALALELEI TUITAMA:** Lau Afioga, o lau matau atu i le Vaega lea e 9, e pei o le suia lea o le vaega e 24 o lo o i ai regulations e faasaga i mea o requirements foi ia a le Malo po o le Matagaluega e totogi atu ai fees i faalapotopotoga foi ia o lea e auai i le lalolagi, faapea foi ma tulaga tau boards securities. O lo o matau lelei la po o le a tonu le vaega lea e ui mai ai le faauilavea a le sui usufono lea. Ma le agaga faaaloalo.

**FOFOGA FETALAI:** Masalo e... leai e faapena, o le faamalamalama a le Malo e faapena ona... ae leaga o lea e tele ina... a silasila foi i le Vaega e 5 o lo o faapena ona suia ai, o lona uiga a tuuina mai i lalo i i, ua maea ona sui le vaega lea e fesili i ai le Afioga i le sui usufono mamalu mai Faleata i Sisifo. A o lea ua saunoa faamalamalama le Minisita, o isi na itu o teuteuga o le Tulafono lenei lau Afioga e pei ona tuuina mai.

#### **FUAIUPU 9: Avea ma Vaega o le Tulafono**

*Faamaonia.*

#### **FUAIUPU 10: Teuteuga faatupulaia.**

*Faamaonia.*

#### **FUAIUPU 11: Soloia.**

**Tofa LEALAILEPULE RIMONI AIAFI:** Faafetai lava. E faamalulu atu i le Minisita, e fia malamalama i le vaega lea, ona o lea ua vaai atu i le structure fou lea ua i ai o lea o le a filifili le Deputy Director General. O le fesili la i lau Afioga, a faitau le Tulafono atoa, tusa na o le Ofisa Sili lea e toe faasalalau. A faapea o tagata uma e faaauau. O le mea la lea e fia malamalama ai, ona tasi lea Matagaluega e tele ACEOs. O le mea o le a sui tulaga ia o ACEOs i Deputy Director Generals, po o le mea o ni avanoa fou mea ia o Deputy Director Generals ia sa i ai, e ese mai ACEOs? Ma lou faaloalo lava.

**Hon TUITAMA TALALELEI TUITAMA:** Lau Afioga i le Fofoga Fetalai, e tele lava fesili faapea o lea sa auale mai foi i le tele o sui usufono i le taimi na faatalanoaina ai le Tulafono i lona faitauga faalua. Ma o le itu lea e le o laaloa ai foi le silasila a le Matagaluega faatasi ma le tatou Loia Sili i le tuufaatasiga o lenei Tulafono. E pei ona fesiligia au i se taimi ua mavae e se tasi o sui usufono i mea lava ia tau redundancies. O lea sa ou ta'u manino atu, o lo o i ai Tulafono e aiaia ai vaega ia, ma e le alo ese ai foi le Matagaluega i le mulimulitaia o ia Tulafono ma ia taiala, ina ia faatino e tusa ai ma faiga faavae a lo tatou Malo. O tulaga la i vaega ia ua taua o contract employees a le NHS e faaauau pea as if there were awarded under the MOH Act. O lona lua o Contract Benefits and Employment Benefits, o le aufaigaluega uma lava o le a faaauau pea ma e maua. O contract benefits foi e faaauau seia oo lava ina maea le taimi o konekarate. For all employees benefit will continue under the Public Service Law. O lea o le a faasee atu nei i la tatou galuega. O le mea tau redundancies, o le a fuafuaina lava e le Director General, i lalo o le Constitution a le Public Service Commission. Afai e i ai ni faamanuiaga i lalo o le tulaga lea i lalo o le tulaga o le vaea mo le aufaigaluega a le NHS. O le a fuafua lava e tusa ai ma redundancy policy under the redeal NHS Act immediately prior to the commencement o le tatou NHS Amendment Bill 2019 lea o lo o faatalanoaina nei. Mo le aufaigaluega lava ia a le MOH, o le a fuafua lava ia faamanuiaga i lalo o le redundancy e tusa ai ma le Public Service Act 2004. E pei o le faaaliga lea lau afioga, e tusa ai ma le faafesili lea mo le faamalalamamaga. Ma le faaloalo.

**Tofa Hon Laufo Fonotoe Nuafesili Pierre Laufo:** Malie lau Afioga i le Fofoga Fetalai

**FOFOGA FETALAI:** Tulai mai le sui usufono mo Anoamaa i Sisifo.

**Tofa Hon Laufo Fonotoe Nuafesili Pierre Laufo:** O au sa ou fesili i le redundancies. E na o le fesili lava e fia malamalama i le seleni lea e faatupe ai redundancies. Po o i lalo o le Tala Faapooopo o le tala po o se isi vaega tupe lea e aumai ai?

**FOFOGA FETALAI:** Po o maua mai le faauilavea...

**Afioga Hon TUITAMA TALALELEI TUITAMA:** Faapea ailoga e fesili se isi i ia mea, o tupe lava a lo tatou Malo. A sau i le NHS e sau i le NHS a sau i le Treasury sau i le Treasury, e fesolo ai lava tupe aumai lea taga aumai lea taga a le Malo. Ao fea la e aumai ai tupe? o tupe a le Malo.

**Tofa Hon Laufo Fonotoe Nuafesili Pierre Laufo:** Lau Afioga i le Fofoga Fetalai, ona o tupe e faaaoga i mea ia, e tatau ona pasia atu e le Maota, o lea e mafua ai ona ou fesili.

**FOFOGA FETALAI:** Onosai mai le sui usufono se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** E le fou leni mea, sa fai foi isi tatou redundancies muamua, e le fou. O lo o i ai foi le ala o mea o lea foi e malamalama i ai le sui usufono sa tulai mai nei. E sao le sui usufono e faatulaga uma lava vaegatupe e faaalu mo lea mea ma lea mea. Ao lea foi e i ai ma vaegatupe lea i tulaga e le i fuafuaina, o lea foi e i ai alagatupe faapena. Mo fuafuaga e lei manino ma le i fuafuaina i le taimi na pasia ai. O le isi foi auala e faatino ai mea faapenei, a alu alu loa ua i ai se tautoai, toe foi mai lava i le Kapeneta, ona avatu foi lea e le Kapeneta ia le faaiuga i le mea e tatau ona fai. E le fou, o le mea lea ia malie le sui usufono, o mea lava ia sa tatou faia i le Kapeneta. E leai lava se auala e fou, ma e le mafai foi ona faatagaina e le Malo se isi e alu alu nofo ona o le leai o se tupe. E i ai lava auala mo le faaavanoaina o isi alatupe e faatino ai. Ae a oo foi lava ua manaomia, e fai lava le faaiuga a le Kapeneta i tulaga masani. O lea foi la na aumai ai le mataupu i totonu e teuteu a tatou faavae mai le 1% i le 3% ae o le unauthorized expenditure i tulaga e mafai ona tua i ai le Malo. Pe a faapea ua manaomia vave ia seleni, ae le i aumaia i totonu, faatoa aumai mulimuli ai i le Palemene leni.

**FOFOGA FETALAI:** Malo faafetai o lea ua maninoí .

**Tofa Hon Laufo Fonotoe Nuafesili Pierre Laufo:** Lau afioga i le Fofoga Fetalai, o lea ua faamalieina le fesili ua i ai tatou unforeseen tatou unauthorized, ao ia ituaiga tali e aumai le isi taga i le isi taga, o a ma a, faamalulu atu.

**FOFOGA FETALAI:** Leaga o tulaga na..

**Hon TUITAMA TALALELEI TUITAMA:** Lau Afioga i le Fofoga Fetalai, o le unauthorized foi o le isi taga a le Malo e le o se taga a se isi.

**FOFOGA FETALAI:** O tulaga lava ia masani e pei ona sau ai, e leai se suiga. O sui usufono foi e pei ona faauilavea, o sui usufono foi sa lotolotoi i tulaga Kapeneta i futia ua sola. Ua lava foi lo latou silafia e leai se mea o suia i faiga faavae a le Malo. Malo faafetai.

*Na faamaonia le Fuaiupu 11.*

**FUAIUPU 12: Ua suia le Faamatalaga 2.**

*Faamaonia.*

**FUAIUPU 1 MA LE IGOA:**

**FUAIUPU 1: Igoa puupuu ma le amataga**

**IGOA: Teuteuga o le Tulafono o le Soifua Maloloina 2019**

*Faamaonia.*

*Na faagasolo le Tulafono Tau Faaofi o Teuteuga o le Tulafono o le Soifua Maloloina 2019, e aunoa ma se Teuteuga.*

**TULAFONO TAU FAAOFI O TEUTEUGA O LE TULAFONO O LE SOIFUA MALOLOINA 2019 - Faitauga faatolu.**

**Afioga Hon TUITAMA TALALELEI TUITAMA:** Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o le Teuteuga o le Tulafono o le Soifua Maloloina 2019 i lona faitauga faatolu.*

*Faaluaina e le Minisita mo le Matagaluega o Galuega, Felauaiga ma Atinae Eseese, Minisita mo le Matagaluega o Pisinisi, Alamanuia ma Leipa ma le Minisita mo le Faalapotopotoga o Tagata Tafafao Maimoa mai Fafo.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia e le Fono Aoaofa Faitulafono.*

**TULAFONO TAU FAAOFI O TEUTEUGA O LE TULAFONO O LE OFISA AUTU O MATAUPU FAALETULAFONO MO TAGATA LAUTELE 2019 - faitauga faalua**

**FOFOGA FETALAI:** Talu ai ua ou taulimaina le Tusi Faamaonia o le Tulaga Faanatinati i le Tulafono Tau Faaofi lena, o lea o le a sagai atu loa i le faitauga faalua. Tapa ma le faaaloalo lau Afioga i le Minisita mo Faamasinoga ma Pulega tau Faamasinoga.

**Hon FAAOLESA KATOPAU T. AINUU (Minisita mo Faamasinoga ma Pulega tau Faamasinoga):** Ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Ofisa Autu o Mataupu Faaletulafono mo Tagata Lautele 2019 i lona faitauga faalua ma ou te fia tautala faamalamalama i ai.*

*Faaluaina e le Minisita o Tupe ma le Minisita mo Aoga ma le Minisita mo Matagaluega o Fesootaiga ma Faamatalaga Tekonolosi.*

**FOFOGA FETALAI:** Ou te tapa ma le faaaloalo lau afioga mo le saunoaga faamalamalama.

**Afioga Hon FAAOLESA KATOPAU T. AINUU:** Lau Afioga i le Fofoga Fetalai, lau afioga i le Palemia faapea sui mamalu uma o le Maota nei, ae a le faafogafoga mai o le mamalu o Samoa i ona tulaga faalupe. Ua taoto i lumamea le Tulafono Tau Faaofi o le Tulafono o le Ofisa Autu, o Mataupu Faaletulafono mo tagata lautele 2019, i ona tulaga uma, ma lona auiliiliga. E pei ona silafia e le mamalu o le Palemene, ua maea ona pasia e le Palemene le Tulafono o le Ofisa autu o Mataupu Faaletulafono mo tagata lautele 2015, o le Community Law Act 2015. Sa toe faia i ai le iloiloga a le Matagaluega o Faamasinoga ma le Ofisa o le Loia Sili i tulaga e tataua ona agai tonu i ai i le teuteuga lea o le Tulafono. E pei ona silafia e le Palemene, o mafuaaga tonu o le faavae o lenei ofisa autu, o mataupu Faaletulafono mo tagata lautele, ma le pasiaina o le Tulafono e pei ona faavaeina ai, ona mafai lea ona i ai se ofisa o le Malo i mataupu Faaletulafono. E ofoina atu le fesoasoani i le mamalu o le atunuu, e le gafatia le totogiina o ni loia, po o a latou mataupu faaletulafono e manaomia ai se loia ma se fesoasoani Faaletulafono. O tiute tauave lenei e tusa ai ma le Tulafono Autu e aofia ai:

Muamua, o le tuuina atu o fautuaga Faaletulafono i le mamalu lautele o le atunuu, e le gafatia loia.

O lona lua, o le tuuina atu o fesoasoani Faaletulafono ia foia ai feeseeseaiga e faasino i fesoasoani Faaletulafono.

Lona tolu o le tuuina atu o polokalame faalauiloa o polokalame tau aoaoga e uiga i aia faaletulafono.

O lona fa, e tulai mo le mamalu lautele o le atunuu e le gafatia se loia i luma o le faamasinoga.

O le Tulafono o lo o i ai nei, e aofia ai le fesoasoani Faaletulafono i mataupu tau soligatulafono po o le criminal ma mataupu lautele lea e taua foi e tatou o le civil. O le agaga tonu lea sa toe fai ai teuteuga lenei o le Tulafono ina tau o mataupu tau solitulafono, criminal e mafai ona faatinoina e lenei ofisa ae aveese uma mataupu lautele, civil. E pei ona i ai le Tulafono autu i le taimi nei. O suiga la nei o le Tulafono autu, o lea e momoli mai i le aso mo le teuteuga. O lenei Tulafono ua faaigoaina o le Tulafono Teuteu o le Ofisa Autu o mataupu faaletulafono mo tagata lautele 2019. Ua teuteuina le vaega 4 o le Ofisa Autu mo mataupu faaletulafono mo tagata lautele 2015 e faapea o le vaega 4, o galuega tauave a le Ofisa Autu o le a tuuina atu lea o fesoasoani Faaletulafono i tagata lautele, na o mataupu tau soligatulafono (criminal matters).

Tolu, ua soloia ese le Vaega 6(2) o le Tulafono Autu. Fa, ua teuteuina le Vaega 11 o le Tulafono Autu ia suia ai le igoa o le Faauluuluga o le Ofisa Autu mai le Loia Faufautua mo Tagata Lautele, Public Applicant i le Loia mo Tagata Lautele, Public Defender. Ma o vaega uma o lo o taua, o le advocant, faufautua i le Tulafono Autu, ua suia nei i le Defender. Lau Afioga i le Fofoga Fetalai, o suiga nei ua faataoto atu mo le iloiloga a le Palemene. Ma le faaaloalo lava lau Afioga.

**FOFOGA FETALAI:** Malo faafetai. Atonu o lea foi sa talanoaina i le tatou semina le faamalamalama o le mataupu lenei, ua lava foi le silafia i ai a le Palemene.



Se i tulai mai lava la le sui usufono lea mo Palauli le Falefa se i saunoa mai i le Tulafono Tau Faaofi.

**Afioga Hon FAUMUINA TIATIA FAAOLATANE LIUGA:** Lau Afioga i le Fofoga Fetalai, ona o au e tele ina ou lavea i mea ia o civil cases, o lea la ua aveese ae o mea nei o faiga palota, e i ai sui usufono ua matua matitiva lava i mea ia o faiga palota, a o civil cases ia, e ala ona mafua ona o le vaega lea o faiga palota e i lalo o le Minisita. A o lea la ua tago aveese o fea la e sulu i ai sui e faiaina po o sui foi e manumalo, a o lea e taufaaleaga e isi. O le mea la e tupu mai, ua ta toe alu foi a o le taugata ia o nei mea, e leai ma se palota ta te le i alu ai i mea nei o faamasinoga. O le mea lea ou te tatalo ai i le Malo, se i tuu i totonu le civil area, le aspect o le civil aua e leai ni tatou tupe se tele, ae ala foi ona faamasino, o le fetotoai o... mo se faataitaiga, o lea la o le a ta alu nei e sue qualifications, agavaa o le sui lea ta te tauva ai, ae o le mea lena a le Minisita ma le Komesina o Faiga Palota o le o e sue agavaa, a o lea ua ta alu ita e ave i le Tulafono ia sue ai agavaa.

O le mea la lena o lea ou te tatalo ai i lau Afioga ma le Malo, se i toe silasila i le civil area, leaga e tele o tatou tagata e latou te le afford ina nei mea, a o lea o le a tatou o e puipui le au agasala, ae tuu le atunuu lautele o lea e manaomia le auaunaga lea. Ma lou faaaloalo lava lau Afioga. Faafetai mo le avanoa.

**FOFOGA FETALAI:** Tulai mai le Minisita.

**Afioga Hon Faaolesa Katopau T. Ainuu:** Lau Afioga i le Fofoga Fetalai, o le agaga tonu o le Tulafono Tau Faaofi lena, e faaagaga mo tagata e faalelava le seleni. O le agaga foi lea sa fausia ai le Tulafono i le 2015 e pei ona ou faitau atu, e aafia ai mataupu i civil ma le criminal ona ua tau suesue atu le Matagaluega, e fai si tele o le seleni e fuafua i le faatupeina o le faamoemoe lea, a o lea e pei e sili le amata laitiiti muamua. O lea la e i ai le teuteuga lea, e taatia e i ai se taimi i le lumanai pe a lava se seleni a le Matagaluega ona toe aumai foi lea i totonu o le tatou civil. A o le amataga lava ia o le Ofisa, pe faamoemoe le Matagaluega ua lava le criminal e amata ai. Ma le faaaloalo lava.

**Afioga Hon FAUMUINA TIATIA FAAOLATANE LIUGA:** Lau Afioga i le Fofoga Fetalai, faafetai o lea ua saunoa le Minisita e i ai se taimi. Ua leai se taimi, o le taimi lena e fai ai le faaiuga. O lea na saunoa le Afioga i le Palemia i le le faaaogaina o tupe i le vaiaso lea na tea nei. O tausaga faaletupe ia ua uma atu, o le tele ia o tupe totoo e le i faaaogaina. E \$61miliona e le i faaaogaina i le 2016, \$101miliona le faaaogaina i le 2017. O lea foi e expect le isi surplus i le faamatalaga o tupe a le Malo lea e faagasolo mai. A faapefea la ona leai se tupe? Toeitiiti lava a \$200 miliona tupe le faaaogaina i tausaga faaletupe e lua lea ua tea. O mea ia, o le puipuiga o le atunuu le mea aupito sili ona taua. Afai la o le tau lea e mafaufau i ai le Afioga i le Minisita, ua matuai ou faanoanoa lava i lena Tulafono Tau Faaofi i le tuulafoai, ua faimeaa faailoga tagata. Faafetai.

**FOFOGA FETALAI:** Malie le sui usufono se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga

Fetalai, o le taua o le mataupu lenei e faasino tonu i tagata solitulafono e faamoemoe mai e totogi e tagata lautele tau o ana loia. O se matua valea o lenei mea. A solitulafono a le tagata alu lava ia e fai ana mea, totogi e ia, a o lea o le a totogi toatele e le lautele o tagata ana soligatulafono. O le mea lea e taumafai i ai le Malo, e fesoasoani i tagata e matua le gafatia lava, le totogiina o soligatulafono matuia. A o isi la mea ia o mataupu lautele, o mea lava e fai e latou. O se mea faavalevale tele lenei mea o le o e fai malamalama mea leaga faapea, aua o le mea lea e ala ai ona agai, e tai pei o le fasioti tagata. O le tele lava o mea faapea e tupu mai i le ita, e faatoa salamo mulimuli ane ua le aoga, ae leai se mea e tagolima i ai.

O le mea lea ou te popole ai, o le tele o loia lea e feoai nei, e le gata i le fanafana mai i le Malo, ae toe o fai mea ia, ia toe totogi atu ai latou e le Malo. Se i vaai i le le fetai. E sili ai ona faaavanoa tupe e ave mo aoga a fanau, nai lo le mea lea o le totogi ai o le tau o o le soligatulafono. Ia e solitulafono ae faamoemoe i le Malo ma isi tagata e o atu e totogi? O le mea lea e sau mai fafo, e le o se mea e amatamea ai tatou, a o manatu e tutupu mai fafo. Ia o lea la ua tatou o nei e sue mai tupe mai tagata, totogi lafoga mo tatou galuega fai. Afai o solitulafono, totogi e latou. Na o le pau lea o se tulaga foi lele e tau fesoasoani atu ai ia i latou e le tagolima, aua o le tele o isi tagata e solitulafono, e tele tupe. A o lea o le a o uma lava i loia ia, e uma ane ua totogi e le Malo. Ua lava lea fesoasoani. Se i mataitu pea a alu alu foi ua le fetai, ua tipi foi ma lena mea, ae se i amata atu i i.

**FOFOGA FETALAI:** Malo faafetai. E lelei foi le taulagalaga e maua ai le faamalamalama a le Malo i mataupu uma ia. E toe fia saunoa mai le Minisita pe ua lava le saunoaga a le Palemia?

**Afioga Hon Faaolesa Katopau T. Ainuu:** Lau Afioga na ona ou faaopopo atu lava, o le mataupu lea o criminal, lea ua i ai le tatou polokalame foi lea o le legal aid, a o lea la ua manao le Malo e faatautaia lava e latou, e leai se tupe e alu ai. O le tupe lava lea e i totonu o le Budget a le Matagaluega, lea la a faaoga lava mai le legal aid e finance ai le tatou public defender.

O lou faalogologo atu e tele tupe ia e te taua....

**Afioga Hon Faumuina Tiatia Faaolatane Liuga:** Lau Afioga i le Fofoga Fetalai e le fia faalavelave le saunoaga a le Minisita, na fai mai foi e leai se tupe e alu ai, a o lea foi ua toe saunoa mai o la e i ai tupe i le Paketi e faaalu ai. Ou te le o malamalama la po o le a le mea e tau o le leai o se tupe e alu ai, a o tupe a le Matagaluega lea e faaoga e totogi ai loia ia. Ma lou faaaloalo lava.

**FOFOGA FETALAI:** Malo. Faaiu mai le saunoaga a le Minisita.

**Afioga Hon FAAOLESA KATOPAU T. AINUU:** Leai, o le uiga o lau faamatalaga e le o se tupe faaopopo i le paketi o la ua i ai le tupe i le taimi lenei.

**FOFOGA FETALAI:** Se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neiote Aiono Galumalemana Dr. Sailele Malielegaioi:** Lau Afioga i le Fofoga Fetalai, o le tulaga lava ia o tupe le faaaogaina, po o tupe totoe, o lea lava ua taoto faiga faavae a le tatou Malo, e tele a mau mea e tataua ona agai i ai seleni, ae e aumai lipoti ua uma tupe, aumai lipoti ua leai se tupe, ua uma tupe. A o le isi la mea lea sa laga i le vaiaso ua tuana'i, ona e i ai tofiga i totonu o Matagaluega, o mea lava ia e manaomia e Ofisa Sili o Pulega o Matagaluega i le taumafai e faagaioi a latou galuega i le tausaga, aemaise la o le job creation o le taumafaiga foi lele ina ia faatulaga galuega fou mo fanau a le atunuu, ona o le Malo lea e tele lo latou sao i le faafaigaluegaina o fanau, e le gata la i totonu o le Malo, ae a fua i le tele o mau atinae ia e fai nei, po o ai lava le kamupani tele o lea e faatinoina, a o lea e alu atu lava i totonu o le Malo. O lona uiga o la e ola ai kamupani, o ai le kamupani o lo o gaioi, le kamupani fai auala ma le anoano o le mau kamupani. E mafua ona ola ma faaaaua a latou galuega, ona o seleni lea e avatu e lo tatou Malo e auala mai i a tatou paaga mai fafo, aemaise foi tatou nonogatupe e maualalo tului, ma o se mea foi lea ou te tautala soo i ai aua o la e faalogologo mai le atunuu faapea ai o faulalai ni tupe. O isi mea ia e tuai ai ona faagasolo a tatou galuega o le tuai ona faagasolo mai galuega tau pepa faainisia, faa-consultants. Ou te tau soo atu lava le mea lenei ina ua malepe le auala lea i Leone, na ona malepe lava maua ma le seleni e toe fau ai, ae 4, 5 tausaga o lea e faatali le faagaioiga o galuega. Tusa la o vaegatupe na o lea e lavea i tupe le faasaoina.

O le auala lea i le Maliolio, o la ua amata, ma ua ova foi ma le 5 tausaga talu ona fai i ai le faaiuga e fai. A o le itu lava lea i le tapenaga o galuega tau pepa, o le faasalalau, o le tapa foi o faalapotopotoga i fafo lea e faatupe mai ai i so latou foi finagalo i le talafeagai o kamupani e fausia, aua e i ai foi le latou aiatatau e taofiofi ai mea nei o le faafaigaluega o kamupani le talafeagai. E leai se poto masani o i ai. E faaeteete tele faalapotopotoga nei i fafo i le mea o le hire ina o tagata e le atoatoa le tomai e maimau a latou tupe.

O lea e le i mamao atu tele na tatou tilotilo atu i le isi auala sima e alu i luga ae ituaiga o auala tetele i totonu o Italia, ae fai e kamupani tetele ua lava le poto masani. Ia na ona uma lava, pe tasi ea pe lua vaiaso ae toe malepe toatele tagata na feoti ai, lea na sau i luga o le CNN. O le mea la lena e ala ai ona matua oooo lava le tapenaga a i latou o lo o gafa ma auala tetele nei, aemaise lava o le tatou Komiti o tauofoga ma le mea e faitio soo ai i le fai ane ua malo lea, malo lea ae o lea e toatele isi, ona e faaeteete tele le latou galuega i le tilotilo totoa i le tomai atoatoa foi masini ina ia lava. O isi fono a le Kapeneta i tauofoga e aumai, e matua mafatia lava le Minisita o Tupe ma le Minisita mo Galuega i le mau fesili, le anoano o le mau fesili a Komiti, aemaise o lea e saofafai i totonu o le Kapeneta nisi o i latou ua malamalama i mea ia o le faiga o tauofoga, aua sa tauofo foi a latou kamupani a o le i omai i totonu o le Malo ma latou iloa ai auala eseese e tataua ona uia ia atoatoa.

Lau Afioga i le Fofoga Fetalai, o le mea lena ua ala ai ona ou toe tulai atu, ina ne i faapea o tele ni tupe o lea e le o faaaogaina. A i ai seleni ua aiaia ae le faaaogaina, a o mea na e vaavaalua ai tatou ma Faalapotopotoga i fafo e ana seleni, loka seleni ia, seiloga lava ua atoatoa tatou tapenaga ma ua tatala mai foi e latou, ona faatoa faagaioi loa lea o le galuega, mo le puipuiga o le saogalemu. O le ala lea na malepe ai le isi auala i Tiavea ona sa faaoga alavai apa, ua pala la mea na, ae sa fai i Paeaiga ua leva, o lea la ua pala, palasi ifo loa i lalo i taimi o tafega, alu atu lava le taavale a se tasi o aiga feoti uma ai i le mea lea. O la foi la ua toe fau le isi auala fou, ona ua pala foi le isi alavai

apa. A o lea la e i ai lau tusi na tusi anapo e ave e fautua i le Minisita, se i saili uma lava kolosi nei auala nei e tafe ai vaitafe i mea valea sa fai i aso la, e tasui uma mo le faasao o le soifua o tatou tagata. E i ai foi le isi vai lea i Aufaga, e i ai foi mea faapena.

Ae mo le puipuiga lau Afioga i le Fofoga Fetalai, e ala ona ou tu atu, o le ala lea e le mama i le Malo upu ia, e tele tupe ia e le i faaaogaina, ae mafua ona o tatou atinae ia lea e loka i i, ona e le i maea tapenaga a inisia, o le ala foi lena e taumafai ai pea le Malo e siitia i luga le tomai o tatou tagata, aua a le siitia i luga, e tele tupe e ono sau, ae tuai le tatou faatinoga. O le mea lea o le capacity o le tagata, e maualuga lava le mea lea tatou te i ai i le va ma isi atunuu, ae faatusatusa i galuega ma le manao lea e manaomia e le atunuu lenei, e le i taitai lava. O le mea lena o lea e ala ai ona fai ma tatou tapatapa i atunuu i fafo mo latou fesoasoani.

Lau Afioga, e taua le fesili, aua ana leai le fesili e le oooo isi faamalamalama ia i le mea lea. Ou te faamalo atu foi i nisi tootoo sa laga le mataupu lea e le faigofie foi i le Malo, e tataua ona faamatala ma faamalamalama.

**FOFOGA FETALAI:** Malo faafetai. Ua ou manatu ua muta ai i i le faamalamalama o le mataupu lea. Ou te faamalulu atu i le sui usufono mamalu o lo o tutulai mai o lea ua manino auofala... Ua manino auofala i lau... Vagana e ese mai le mataupu lea, aua o lea ua manino le faamalamalama a le Malo i le...

**Afioga Tafua Maluelue Tafua:** E matua ese mamao lau Afioga ma le faaaloalo. O lea ua ou faalogologo atu i le talanoaga nei i le taeao, e momoli atu le faafetai i le Palemia ma e sa faatuina le manatu. A o le mea lea e faailoa atu i lau Afioga i le Fofoga Fetalai....

**FOFOGA FETALAI:** Se i faapuupuu mai la le saunoaga.

**Afioga TAFUA MALUELUE TAFUA:** Faafetai lava. O lea ou te matau atu i le Tulafono Tau Faaofi na o le suiga lava. O le sini lea ma mafuaaga. Na o le tasi lava le mea lea e i ai, sui mai le Loia Faufautua i le Loia mo Tagata Lautele. Na pau lava lea o le Tulafono laititi lea ou te uuina lau Afioga, a o lea ou te faalogologo atu, o le taua foi ia o le talanoaga i lenei taeao. E momoli atu ai le agaga faafetai i le Palemia, leaga o lea na ou faalogo atu o tau mai le matou auala i Tiavea. E le tasi la, a o le tele ia o alavai lea e i gauta o Tiavea, o la foi e taofia le isi alavai lea e i gauta o Samusu, la e tele lava le faaletonu la e i ai mo le saogalemu o tagata lautele. A o le faalogologo atu i le Tulafono, pei na o le pau lava lena o le upu lea e sui o le tatou Tulafono. Ma le faaaloalo. E fesoasoani atu ai i lau Afioga.

O le isi mea lau Afioga o lea ou te manatua, e i ai lava le mea foi lele e faapapalagi, Law is an ass, a faa-Samoa o le Tulafono, o le asini lea. Ia atonu ua talafeagai ma lenei taeao i le tatou talanoaga. Ma le faaaloalo.

**Afioga SULAMANAIA FETAIAI TAUILILI TUIVASA (Vaimauga i Sasae):** Lau Afioga i le Fofoga Fetalai pe maua se avanoa, e le i saunoa foi le Minisita e ana le Tulafono Tau Faaofi faamolemole lau Afioga.

**FOFOGA FETALAI:** Se i faapuupuu mai o lea ua see foi le vaa o le Nofoa. E i ai mafuaaga e ala ai ona ou manatu e vave tulai mai sui usufono e fia saunoa ina ia saunoa le Malo e kava uma ai saunoaga a sui usufono mamalu. E ui i lea, e tuu atu pea le avanoa i le aiatatau a le sui usufono. Ae malie le sui usufono e faapuupuu mai.

**Afioga SULAMANAIA FETAIAI TAUILILI TUIVASA:** Masalo ae le i faia foi se sao o lenei itumalo i le Tulafono Tau Faaofi, e muamua ona avatu le faamaisega i si o matou itumalo aemaise foi o si ou nuu i Fagalii e tusa ai foi ma le valaau paia a le Atua i le afioga i le Alaalatama. Ia faamaise le Atua ia outou le aiga faanoanoa aemaise si o tatou nuu i le valaau paia foi a le Atua i si o tatou tina. O lenei taeao lau Afioga i le Fofoga Fetalai, e taua tele lenei mataupu ua opea i le Maota, e faafetai atu ai lenei itumalo i le Afioga i le Minisita i le taulagalaga aemaise foi o Minisita Lagolago, aemaise o le Ofisa Sili o Pulega ma le tulaga i le Ofisa o Faamasinoga.

E taua i lou sui usufono ona o Minisita ia e aumai i totonu latou mataupu i totonu o le Palemene i Tulafono, e iloa ai e le o momoe. O lo o feala pea i Tulafono e faafaigofie ai le faagaoioiga o si o tatou atunuu. A o le talosaga a lenei itumalo i le Tulafono ua opea nei, o lea o le a aveesea le vaega lea mo civil matters faamolemole, aitalafu. A o le popolega o lou sui usufono, o si vaega lea o aitalafu foi nei ua le totogia aitalafu i banks ma mea faapena, ona o loa lea o banks ave nai sui ia i le falepuipui, pe ave e loka. A uma loa ona loka pe lua masina pe a, toe foi mai i tua nai vaega lea ua le totogia aitalafu i banks ma nisi... ae omai toe talosaga e toe totogi pea le aitalafu lea. E pei la o le tatalo lea e avatu i lenei vaega, ona o lea ua aveese le vaega lea o le aoina o aitalafu, pei o lea ua sala faalua. Ua uma ona faafalepuipui i le lua masina pe a, ae toe foi mai ma le poloaiga a le Ofisa o Faamasinoga e o pea e totogi aitalafu i banks ia. E pei o sina tatalo lea ona o le taua o le vaega lea i lou vaivaiga, o lea o le a aveese le tulaga lea i le aoina o aitalafu lea e mafatia ai le toatele o le atunuu, a ua uma ona faatino le auaunaga e ave e loka i falepuipui pe lua vaiaso, ae omai foi toe o toe totogi. Ae a pe a ua lava lea lokaina i Tafaigata. E pei o sina vaega lena.

O le lona lua, o lea e matau atu e i ai le Tulafono lea e Tau Faaofi mai a le Matagaluega o Faamasinoga e aofia ai Loia, ae faafetai po o le loia lea e patino i le vaega lea, le vaega lea o soligatulafono. Ae o lou sui usufono faamolemole, e pei o le vaega lena o le a aveese la le aoina o aitalafu a tagata lautele, ona o lea ua sui fua le igoa ona o lea sa manaia lava le igoa o Loia Faufautua ao lea ua suia mai le Loia mo tagata lautele, o lona uiga o tagata lautele o le a alu atu uma ai lava ma e lima malolosi, ae manaia pe ana faapea, loia mo e lima vaivai, ona agai lava lea na o e e le mafai ona totogi ni Loia e totogi e lo tatou Malo, ao lea o le a o atu ai ma e lima malolosi e mafai ona gafatia na totogi Loia. Ma lou faaaloalo lava lau Afioga i le Fofoga Fetalai.

**FOFOGA FETALAI:** Ua maua atu faafetai. Ia, se i tulai mai le Afioga i le Minisita mo Faamasinoga ma Pulega tau Faamasinoga.

**Afioga Hon FAAOLESA KATOPAU T. AINUU:** Lau Afioga i le Fofoga Fetalai, o le mataupu lea e taua muamua e le sui usufono lou uso mai Vaimauga Sasae, e ese le mataupu lena, o lena foi ua i ai, ua uma ona faataatia aulape o nei mea o le entitle i le loia. E pei ona ou avatu i le taimi ua fano, o le agaga o le Tulafono i le teuteuga lenei, na pau lava le agaga o le Tulafono ina

ia faagaoioi le Ofisa, na o criminal matters, e mafai ona tu ai le loia lea a le Malo ua taua o le public defenders. A o le isi mataupu, se i maua se malosiaga o le Matagaluega i mea tau tupe i le lumanai ona faatino lea, ae le soona faatino foi la, e faatino fuafua. Ma le agaga faaaloalo.

**FOFOGA FETALAI:** Malo faafetai. Ia se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaioi:** Lau Afioga i le Fofoga Fetalai, o le vaiaso le la sa fai lotu ai le isi faifeau lea na moeiini ona mata e tatalo, moeiini atu ai ma mata o leoleo ae sosola pagota e toalua. O le lauga la na ou faalogo i ai, o outou ia pagota, ua lelei tele le tausiga o outou, o isi o outou o lea ua toe lua aso ae magalo, ae toe sosola ina ia fai ai pea se isi mea ma se isi mea tou te omai ai pea omai ai pea i totonu o le falepuipui. Ia ona tatalo loa lea, e toe pupula atu mata o le faifeau ua sosola le toalua lea e le o toe mamao ona magalo lea. O lona uiga, ua fiafia ai lava lea toalua e sosola ma o atu i totonu nofonofo ai. Aua foi ua pei se hotel le tatou falepuipui, ua leai ni faiga pei o mea sa i ai i aso la.

O le mea lea e saunoa mai ai le sui usufono e sui le faaupuga i e lima vaivai, o lea ua tatou iloa lelei lava le masani a isi o tatou, e tau atu loa se mea i i, e vaivai uma lava, e oo lava i e lima malolosi ua vaivai uma lava, aemaise la i le taimi lenei i le anoano o tagata o la e nono i le Faletupe o le DBS, nono i le NPF, nono i le SCB, nono i le BSP, nono i le National Bank. E lima banks, ono i Faalapotopotoga ia, ae ese ai isi Faalapotopotoga i tua. E ala ona ou iloa mea ia, ona e toe sulufai atu ia te au i lou faalupega lea o le tama o le atunuu, mo se fesoasoani, a?. Ia ou te vaai atu loa ua tagi ou tagi atu ai foi ma au. Na pau lava lea o le mea e mafai ona ou faia o lou faamafanafana i loimata.

O le tulaga lena e faaeteete i ai, aua e fai loa le faaupuga lea e aumai e le sui usufono mo e vaivai, o lona uiga e tatala atu le falepuipui fou ua le lava, aua o le a fiafia tagata uma e faataga vaivai ma totope ai latou aitalafu. O le faletupe foi latou e faia mea ia, o latou e ao a latou aitalafu, fai latou galuega. Ia e vaai atu lava i tagata o la e nono tupe i isi faletupe ae saga fai lava, ae faalagolago la i le Ofisa o Leoleo e o e tulituliloa? Ia a o la foi ua mumusu leoleo latou o lo o tele foi latou galuega. O le a le mea o le a latou o ai fua? A o le mea e faaoga i ai le faautautaga tatau. Afai lava o outou uma lea e nono atu tou tupe i ai latou e le faamaoni ae faaletonu, faitalia outou, aua sa tatau ona outou iloa le mea e tatau ona fai ma le mea e le tatau ona faia ae fai lava ae tou te faalagolago mai i le Ofisa o Leoleo e o e tulituliloa lo latou faatamala, o leoleo foi e tele a latou galuega o la e fai.

Lau Afioga i le Fofoga Fetalai, o lau toe faaopoopo atu lena.

**FOFOGA FETALAI:** Malo faafetai. Ua maea foi ma manino le tulaga o lo o i ai, aua le faamatananaina le atunuu. Aua le avea i ai le ia ae fai ma ave i ai ma le upega ina ia iloa fagota.

*Na faamaonia le lafo ma faitauina le Tulafono Tau Faaofi o Teuteuga o le Tulafono o le Ofisa Autu o Mataupu Faaletulafono mo Tagata Lautele 2019 i lona faitauga faalua.*

**TULAFONO TAU FAAOFI O TEUTEUGA O LE TULAFONO O LE  
OFISA AUTU O MATAUPU FAALETULAFONO MO TAGATA  
LAUTELE 2019 - iloiloga auiliili**

**FOFOGA FETALAI:** E tusa ai ma Tulafono Tumau e amata le iloiloga auiliili i le Fuaiupu 2.

**FUAIUPU 2:** Ua teuteuina le fuaiupu e 4.

*Faamaonia.*

**FUAIUPU 3:** Ua teuteuina le fuaiupu e 6.

*Faamaonia.*

**FUAIUPU 4:** Ua teuteuina le fuaiupu e 11.

*Faamaonia.*

**FUAIUPU 1 MA LE IGOA:**

**FUAIUPU 1:** Igoa puupuu ma le amataga.

**IGOA:** Teuteuga o le Tulafono o le Ofisa Autu o Mataupu Faaletulafono mo Tagata Lautele 2019.

*Faamaonia.*

*Na faagasolo le Tulafono Tau Faaofi e aunoa ma se Teuteuga.*

**TULAFONO TAU FAAOFI O TEUTEUGA O LE TULAFONO O LE  
OFISA AUTU O MATAUPU FAALETULAFONO MO TAGATA  
LAUTELE 2019 - faitauga faatolu**

**Afioga Hon FAAOLESA KATOPAU T. AINUU:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Ofisa Autu o Mataupu Faaletulafono mo Tagata Lautele 2019 i lona faitauga faatolu.*

*Faaluaina e le Minisita o Tupe, Minisita mo Aoga, Taaloga ma Aganuu ma le Minisita mo Fesootaiga ma Faamatalaga Tekonolosi.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia e le Fono Aoa Fautulafono.*

## **TULAFONO TAU FAAOFI E FUAFUA TATAU AI LE AVA MALOSI 2018 - faitauga faalua**

**FOFOGA FETALAI:** Tulai mai lau Afioga i le Minisita o Tupe Maua faamolemole.

**Afioga Hon TIALAVEA FEA LENIU TIONISIO HUNT:** Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi e Fuafua tatau ai le Ava Malosi 2018 i lona faitauga faalua, ma ou te fia tautala faamalamalama i ai.*

*Faaluaina e le Minisita o Tupe, Minisita mo le Matagaluega mo Tina ma Tamaitai, Atinae o Nuu ma Afioga ma Agafesootai ma le Minisita mo le Matagaluega o Faatoaga ma Faigafaiva.*

**FOFOGA FETALAI:** Ou te tapa ma le faaaloalo lau Afioga i le Minisita mo lau saunoaga.

**Afioga Hon TIALAVEA FEA LENIU TIONISIO HUNT:** Faafetai i lau Afioga i le Fofoga Fetalai. O le tulafono lenei o le fuafua tatau o le ava malosi 2018, o le a soloia ai le Tulafono o le ava malosi o le 2011, o lo o i ai ma o lo o faaaogaina i le taimi lenei. O le sini autu lava o le Tulafono lenei o le faatuatuaina faaletulafono o le faatauina atu ma le tuuina atu o le ava malosi, e ala i le fuafua tatau o lona tulaga e faigofie ona maua. O le faaitiitia o manaoga mo le taumafaina o le ava malosi ma ia tuuitiitia ai aafiaga matuia mai le soona faaoga sese o le ava malosi. Ua faatulafono foi e le Tulafono fou lenei le faasalalau faatosina ma le faalauiloa o oloa tau ava malosi. Ma lagolago tau tupe fesootai ma le faatauina atu ma le taumafaina o oloa tau ava malosi, ma ia faamautinoa o ia gaioiga uma, e faatino ma le faautauta lelei, aua le tulaga manuia o le atunuu lautele. Ia aiaia ai ma malosiaga, e faamalasia ai le Tulafono e faasino i le gaosiga, faatauina atu le taumafa ma le faaulufaleina mai o le ava malosi i totonu o le atunuu. Ia faaitiitia ai faafitauli o so o se ituaiga e fesootai ma le ava malosi, ma ia aiaia mo tiute ma matafaioi a matua ma tagata e tausia fono a nuu ma ekalesia, i le faaaogaina o le faiga faatonutonu faaletulafono. O le Tulafono lenei na amata ona fausia mai i le 2015 e le vaega o Law Reforms, ina ia taumafai e tuu faaitiitia ai le inu ava malosi ma le tele o Tulafono. Ma e faamalasia ai foi le Liquor Board, i ana faiga faavae fou ua amata nei ona faatinoina.

O le Tulafono lenei fuaiupu 77 ua atoatoa ai i i tulaga uma lava i le taofia ma le puipuiga o le Tulafono i ava malosi ona ua faatupulaia tele faalavelave e tutupu. O le tausaga ua tuanai ia Ianuari e oo ia Tesema 2018, e 2,136 faafitauli sa logoina atu i le Ofisa o Leoleo, e mafua mai i le ava malosi. O le tulaga lena ua amata ona oo i ai, o soligatulafono, o telefoni na o atu i le Ofisa o Leoleo i le tausaga ua tuanai e 2,136.



E eseese uma lava mafuaaga o faafitauli nei, ao le agaga lena ua taumafai i ai le Tulafono lenei e tau puipuia mai le tele o faalavelave tutupu. E le mafai foi ona atoatoa, e fiu lava e taofiofi leaga o le tagata lava ia ma lona faitalia e taumafa ai le ava. So o se faalavelave lava e tupu e blame lava le ava malosi. Ao le agaga lena o le Tulafono lenei, ia taumafai ona faaitiitia mai, aemaise foi le augaosi ava, ina ia tausisia lelei le gaosiga o le ava ma i latou foi o lo o aumaia le ava malosi i totonu o lo tatou atunuu. E pei o se faamalamalamaga lena lau Afioga i le Fofoga Fetalai, mo le Tulafono Tau Faaofi o lo o taumafai atu ai nei. Faafetai mo le avanoa.

**FOFOGA FETALAI:** Malo faafetai. Ua manino auofala

**Tofa Lealailepule Rimoni Aiafi:** Lau Afioga i le Fofoga Fetalai.

**FOFOGA FETALAI:** Se i tulai mai. Tasi lua tolu. Sei faamau ifo e toatolu sui usufono o lo o tulai mai e fia saunoa. Saunoa mai le sui usufono mo Salega i sasae.

**Tofa OLO FITI AFOA VAAI:** Faafetai i lau Afioga i le Fofoga Fetalai, ua maua so matou avanoa e avatu ai foi nai motugaafa e tusa ai ma le Tulafono Tau Faaofi po o nai teuteuga foi o le tatou Tulafono. Faafetai i lau Afioga i le Minisita ma le mamalu o le Pulega ma le Matagaluega mo le silasila mamao i tulaga faapea. E vagana o Tulafono e tau foia ai faafitauli e pei ona tulai mai, o lo o manino le atunuu i tulaga uma.

E pau lava le fautuaga i lau Afioga i le Minisita, se i tau silasila totoa i le tatou Komiti lea o le Liquor Board, e matauina lava lau Afioga, e le o ogatasi ma tutusa ia latou faaiuga. E le o toe po se lilo o lea ua matauina e le atunuu, ia le tele foi o faalavelave e tutupu mai i totonu o tatou fale faafiafia po o tatou falekalapu. Ua maliliu ma fano ai le soifua o nisi. Ao la e matauina lava e le o faia i ai se faaiuga e pei o lau faaiuga lea sa fai ia au, i lau pisinisi. E leai e mama lava le avatuina o le mataupu leaga ua fesiligia le amiotonu i la outou faaiuga.

O lena foi taimi sa o tatou soalaupule ai ma tatou talatalanoa i mataupu faapea, ia sa avatu lava le fautuaga. Ae peitai ane, e foliga mai ou te vaavaai atu, e tele ina malolo lau afioga a le Taitaifono, ae talanoa mai sui foi ia ou te malamalama lelei lava i ai, e le malamalama i mea faapea i faiga faavae a le Malo lea e i totonu. E tasi lena vaega ou te fautuaina ai, se i avatu lelei nisi o le mamalu o le atunuu e malamalama lelei i mataupu leaga e le faigofie mataupu faapea. E tatau ona saofafai i totonu o lau Komiti, ona avatu lea o se fautuaga lelei lava i lau afioga. E pei na ona pau lena o le tulaga na ou tulai atu ai lau Afioga i le Fofoga Fetalai. O le mea e sili ona taua o le fai o faaiuga ma le amiotonu. Ma le faaalalo.

**FOFOGA FETALAI:** Malo faafetai. Se i tulai mai le sui usufono mo Faleata i Sisifo. Malie le Minisita se i maea le saunoaga a sui usufono ona lafo lea i le Malo.

**Tofa LEALAILEPULE RIMONI AIAFI:** Faafetai faapitoa i le Afioga i le Minisita mo lenei Tulafono taua. E matauina e lou sui usufono, e tau le misi a tatou fonotaga ma Tulafono a le afioga i le Minisita lea. E taua tele, aemaise lava le Tulafono lea ua tuuina mai i le taimi lenei.

O le tele o vaega ia na o tatou fautuaina i le Malo lea ua tele ina tuu mai i le Tulafono. Ae i ai lava na i vaega laiti ia e fia fesoasoani atu ai lau afioga. Muamua, o mea ia o falekalapu ua tatau ona.....ona o lea ua ou tilotilo atu i le Tulafono e le o manino le vaega lea. Atonu ua tatau ona faatulafonoina i latou o faigaluega i falekalapu, o security, aua e pei o le mea lea o lea ua fai e atunuu i fafo. Ave se ono masina, ua tatau ona fai se...pe o le Ofisa o Leoleo, Matagaluega a leoleo,..... e fai lava sina.....e fai ni short term training mo tagata nei. A o foi e fai a latou training nei, e maua a latou certificate ona maua foi lea o siitaga i o latou totogi ma faaaoga. Ua lava tagata nei e faaaoga i galuega nei. Ma e le faapea foi na o security i totonu o falekalapu ae security lava i so o se galuega. Ae ona o le mea lea e i ai, o le tagata lava e fia alu atu e tino lelei ma malosi, ona faa-security guard lea ma faafaigaluega lea faapea, ae e le o i ai se malamalamaaga, ona e le faigofie le galuega. Manatua foi o falekalapu tou te faafesagai ma tagata onana, ona i ai lea o tulaga ia e pei ona tulai mai, ae ua tatau ona tagai i ai la tatou Board. E faigofie lava, ona aumai ai lea o ni latou laisene faapitoa ia e faigaluega ai.

O lona lua, e manatua foi lau afioga o tatou, e faamoemoe tele tatou i turisi, ina ia i se i toe tagai ane i pia ia e aumai fafo. Aua e aoga foi le tele o variety foi lele, ne i te i ua faataugata tele ia pia ia mai fafo. Ae aoga foi, ina ia maua e tagata mai fafo ma tatou uma ia le filifiliga e faatau ai. E le gata i lea, o lea ua ou matauina talu ona fai la tatou Tulafono talu ai, o le siitia o lafoga. E i ai nai isi fale ia e gaosi ai mea malosi iinei, pe i a o uta i Nuu. I lou talitonuga lau afioga, o le mea a tatou e fai ma le Komiti, ia faamalolosi Tulafono ia, ina ia vaai le lelei ona gaosia o fagu nei. Ia lelei le alcohol content ia vaai faalelei ma mama mea e fausia ai ma lelei, ina ia faigofie ma lelei le faatauina aemaise foi e fesoasoani i ia tagata e tele foi lo latou sao. Ao le vaega lea e i ai o lea ua manino i le Tulafono ia faasalaga o i latou ia e faatau mea le talafeagai. E pei e toe tagai i ai lau vaega i le vaega 68 o le Tulafono, e pei ua laititi tele le faasalaga. Aua o mea ia tatou te puipui i ai, e tele atu le faasalaga o le tagata lea e aumaia information sese, i lo o faasalaga o tagata nei e faatau ava malosi le talafeagai.

O le faaiuga o le tausaga, ou vaai atu i le isi fale wholesale, ae ou vaai ai i le fagu. Ae vaai i ai i le fagu e pei lava o se cocoa cola, ona ou fai atu lea i le teine, po o le a le fagu lea?, ae fai mai o le fagu fou e fai iinei. Ae o le uaina, o le uaina mumu ae sui i le cocoa cola, e pei se fagu suamalie foi lele, ao le uaina.

Ia tailo i lau afioga, o au nei ua leva ona tafao sa fai foi lau falekalapu, ae faatoa ou vaai lava lea ma ou faalogo i se fagu uaina ua sui i se mea suamalie. Se i tagai i ai aua o mea ia e tilotilo i ai. O le mea la lea na ou talanoa atu ai lau afioga i security, se i toe tagai i vaega na o le Tulafono, vaega 62, na e faapea mai le Tulafono, e mafai ona faaaoga se malosi talafeagai a reasonable force e aveese ai tagata mai totonu o le falekalapu ma le faasoesa. Na tatou finau muamua foi i le vaega lea o le reasonable force po o le a tonu lava le mea e taua o le reasonable force, ina ia puipui tagata tafafao puipui foi ma tagata faigaluega ma le taimi e faatino ai a latou galuega.

**FOFOGA FETALAI:** Malo faafetai.

**Tofa Hon LEALAILEPULE RIMONI AIAFI:** Toeitiiti lava uma atu lau afioga, toe lua lava itula. Ma le mea la lea na ou talanoa atu ai o le fausiaina o ava malosi ia e i ai nei. Manatua o lea ua faatino le ava malosi a le SROS, lau

Afioga i le Minisita o Faatoaga, e manaia ta fia faataitai foi i le fagu, ae avatu le tau o le pau toeitiiti lava \$200 po o le \$150 i le tau o le fagu. Se i toe tagai pe faapefea ona oo i ituaiga tau faapea, ao lea e taumafai tatou e promote vaega faapena.

O le isi vaega aua o lea ua tele ina tapunia ma faaitiitia le faatauga o fagu ae se i tagai lau afioga po o fagu tonu ia o lea tele ai faafitauli, po o fagu malosi ia po o isi ituaiga fagu, po o ni pia po o mea faapena, ina ia faalatele le vaai a lau afioga i tulaga o mea nei. Ae faafetai o lea ua manino le Tulafono, a i ai se faalavelave e toe tupu mai i se falekalapu, e i ai le malosiaga i leoleo, e tapuni ai lava i le po lea po o le aso e sosoo ai. Ae fai le suesuega a le Komiti pe tatau ona toe tatala, leaga e taua tele le vaega lea. Aua ne i toe faatalia i le tapunia o le falekalapu ma le tupu mai o mea faapea ma faaletonu. Ma le faaaloalo lava faafetai.

**FOFOGA FETALAI:** Tulai mai le sui usufono mo Gagaifomauga Nu.3

**Susuga Hon LAAULI POLATAIVAO LEUATEA (Gagaifomauga Nu.3):** Lau Afioga i le Fofoga Fetalai, e faafeiloai atu i lau Afioga ma le mamalu o le Palemene i lenei taeao fou. Ae avatu le faafetai tele i lau Afioga i le Minisita ona o le faatulai mai o lenei Tulafono Tau Faaofi. O le matou matau lau Afioga, e le toe na ma se laina le tulaga faigata lea ua tatou i ai. O le upu tautino lau Afioga i le Fofoga Fetalai, o le fasioti tagata numera tasi lea ua i totonu nei o le atunuu i le taimi lenei. O faalavelave tutupu, vaiaso uma, masina uma, tausaga atoa. O le fasioti tagata numera tasi lea lea ua i totonu o le atunuu. E le gata la i faalavelave ua faatino e tagata pe toatasi, a o le aafia o le atunuu, o le maaveave le fua ona o i latou e tagofia le ava malosi, ma feoai le mafaufau i luga o le aualatele ma faatupu le vevesi.

Lau Afioga o le agaga lena na taumafai atu ai. A toe tepa i tua, e le fou le mea lenei o le tatou taumafa ava, na omai a Siamani ma Niu Sila ma aumai mea nei ma latou. Ou te tupu ae foi au ia ma ou auai i pisinisi a lou aiga, e sa se Samoa, e matua sa lava se Samoa ona tago i le ava a o le tasi lena le tatou liquor board ona o le faaeteetega lea sa i ai lena vaitau, a o le taimi lena e leai ma se tatou mea gaosi iinei, sa tasi a le mea na lau uma mai ai pia, na omai a Siamani ma Niu Sila ma Ausetalia ma lau mai. Peitai o le taimi lenei lau Afioga, talu mai ona faatulai mai lenei mea o le tatou gaosi o pia iinei, ua aliae mai la nisi o faafitauli tatou te le manaomia.

E momoli atu ai le faafetai tele i lau Afioga i le Minisita, faafetai ua e le nofonofo ai, aua a tuufaasao fuainumera i le 2000 cases ia e ave i leoleo, masalo o le 90% o le ava malosi. Oti, oti, oti e oo foi i mea nei o fasiotiga tagata nei mulimuli nei i le atunuu lau Afioga, e mafua mai o le ava malosi. O le fesili la; o le a le mea ua faapenei ai le onana a tagata? People are going wild when they are drunk at this stage.

Sa fai atu foi lau tuualalo i le tatou Maota i le taimi ua sola, e i ai le kamupani lea latou te aumaia le mea lea na ou fautua atu ai. E le o se mea e tatau ona faaoga i se ava malosi, o le sipili tutu moli. Sa faasaina foi leaga sa tele ai le aafiaga i le atunuu. E oo mai i le aso, e leai lava se mea o aumaia i luma e faamalamalama sou manatu ua avatu. Ae silasila lau Afioga, o tatou oloa lea ua gaosi iinei, ou te tautino atu, e le lelei. Lau Afioga i le Minisita, silasila totoa ia i latou nei lea e gaosia, ua matua ova le pasene ua onana ai tagata tulou lava le gagana, ua leai ni mafaufau. Na ona onana lava manao e fasioti, fasioti, ua le tasi le fasioti, lua, tolu, at the same time. Ae na ona avatu

faapena lau Afioga, ina ne i te i ua tatou alo i le ata o le laau pe pouliuli le tatou vaai, a o lau tautinoga lau Afioga i le Fofoga Fetalai, o le ava malosi, it's the biggest killer lea ua i totonu o le atunuu. Ae faafetai i lau Afioga i le Minisita ua aumai lenei Tulafono Tau Faaofi se i faatonutonu folau i le tulaga e agai i ai tatou, leaga e le mafai ona tatou taofiofia le aiatatau a tagata e tatau ona taumafa, a o le mea lea ua tupu, ua out of control.

Ia ae na ona faapena atu lau Afioga i le Minisita, lafo atu, a i ai nisi mea e toe saisai mau ai, saisai. O le mau lena a le itumalo, leaga ua tupu, e le na o le taulaga. A outou vaai i ai i fonu a nuu, tea, tea, tea, o le mea lava lea. Ua omai tupulaga ua o i luga ma talanoa ma fai fetusiaiga e faaoga ai foi faiga faatekonolosi, ua faapena ona fai, ae na ona matou tuitui malofie ma avatu i tafatafa o lau Afioga i le Minisita, a i ai ni kamupani gaosi ava malosi i Samoa o lo o latou le mulimulitai i tulaga o le fonu faufautua a le tatou liquors board faamolemole, tapunipuni.

Ia ma le agaga faaaloalo, o le tuualalo lena.

**FOFOGA FETALAI:** Malo faafetai. Ia, tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaosi:** Lau Afioga i le Fofoga Fetalai, se i tulai mai le Afioga i le Minisita ae tali atu i nisi o manatu faaalua. Ou te toe faataua lava finagalo ia sa faaalua, o lea foi e faafogafoga le Minisita e toe silasila i ai le Komiti, aua o le Tulafono lenei e agai atu i le Komiti o Tulafono, e tapa ai foi le atunuu ma nisi i o latou finagalo faaalua, aua tatou te aafia uma ai lava. E 2,036 i le tausaga talu ai valaau telefoni i Leoleo mo se fesoasoani, e le iloa pe uma atu lenei tausaga ua oo i luga i le 5,000 valaau mai i le tatou Matagaluega o Leoleo.

Faamalo foi i le Komesina ma le mataalia o le latou foi vaega i le faia o mea nei o road blocks i le taimi o malologa. Tasi lea galuega tele o lo o feagai ma malu o le Malo o lo o taofiofi ai faalavelave tutupu mai ma tagata feoti, aemaise o le toatele foi o tatou aiga e omai mai fafo, e omai ona faapea lea o lea ua omai i le saolotoga o le latou atunuu aemaise lava o le autalavou, ona feaveai ai lea o taavale i se tulaga saosaoa ma le le tapasa ma tutupu ai foi isi faalavelave. E taua tele le itu lea o le aafia o latou ia e lipoti mai le maumau o le soifua, e onana. E le gata la ina onana ae masalomia foi ma drugs. o le ala la lea e tatau ai foi i le Ofisa o Leoleo ona mataala i mea ia. E i ai lava manatu e tatau lava ona maua mai loa tagata ia molia loa ma fai loa le gaioiga ina ia faatumau ai le talitonuga e le gata ina onana i pia ae onana foi i fualaau faasaina aemaise lava le ice lele ua matua matautia le aafia ai o fanau a le atunuu. A lualuagia loa le pia i le ice, e fanau mai ai le oti. O le mea lena o lea e masalomia i le tele o faalavelave lea e aafia ai le soifua, e tatau ona faataua pea o lea e faafogafoga mai leoleo.

O le itu taua lava lau Afioga i le Tulafono Tau Faaofi lenei, o le sao o tatou leoleo. E i ai fale kalapu ia e i Matautu o lo o lipotia mai pea misaaga e faia i ina. O le tulaga i mea nei o latou security mo le puipuiga, e leai so latou malosi faaletulafono. O le mea moi e tatau ona fai, a tutupu loa mea faapea logo leoleo, ae le o le o ifo o outou... o securities ia na ou faalogo, o latou ia lea e faaoina manua i tagata, ae leai se latou aia e fai ai mea ia, o le solitulafono le mea lena. Ma e tatau foi ia i latou o lo o fai a latou pisinisi faapea ona silasila totoa i ai. Logo leoleo, na o leoleo e i ai le power lena na ona o atu lava loka mai. E malamalama tele i ai Olo i le taimi sa fai ai lana

fale kalapu lea. E oo mai lava i lou fale, se i vaai i le mamao? Ou te faalogo atu lava i le pao mai ma faalavelave e tutupu ai i totonu i i, e masalomia foi le faatauina o mariuana i totonu o falekalapu lena a Olo.

Lau Afioga i le Fofoga Fetalai, o le tulaga lena, e taua tele mo mea o falekalapu le hire o securities ae leai sa latou aia, leai se tou power e faaoo ai le manua i se tagata. A vaai atu loa i se faalavelave, na pau lava le mea o le ave filemu i fafo. A outou vaai atu loa ua oo i le tulaga e le mafai ai, logo leoleo.

E le gata foi i lena, ua fai ai ma amio ona faapaepae i fafo le otaota, lapisi, plastics. E tatau foi i le Ministry o le MNRE ona silasila totoa i mea ia, molia uma latou ia i le fai lapisi. O le au onana uma nei ma i latou lea e fai falekalapu faapea, e tatau ona o ifo e tae uma a latou otaota, ae le na o le tupe ae faaotaota e tiga ai fofoga o le atunuu feoai . E tele naunau le irresponsible o tagata nei e fai a latou pisinisi faapenei, na o le tupe, tupe, tupe e agai i ai ma le tele o poumoli ia e taso e le gata o moli auala, a o moli pepe faasoloatoa ai le atunuu.

Lau Afioga i le Fofoga Fetalai, o mataupu ia e taua ai tele le Tulafono lenei ua faatulai atu. E tatau foi i le tatou atunuu lautele ona silasila totoa e le faapea o le a vaai atu lava i le pisapisao o tagata ae nofonofo ae tatau loa ona logo leoleo. O isi tagata o la e tilotilo mai aiga, ae omai ua saga solo i le aualatele ma faasasaga atu i le aiga, a o la e vaavaai mai a latou fanau. O mea o uiga leaga uma lava ia e fai e tagata onana ua le toe i ai ni mafaufau.

O le tulaga la lena lau Afioga i le Fofoga Fetalai e taua tele ai le Tulafono lenei, ina ia tau maua ai ni tagata a o atu e fiafia i totonu i i, e le o le inu ona le mea e fai. Inu fiafia, toe o i le fale e le i suaava ina ia le maua ai e leoleo, aua o le mea foi lena o lea e fai ai poloka a leoleo i taimi faapea ona o le taumafai ina ia aua ne i aafia le soifua o tagata lautele.

Lau Afioga i le Fofoga Fetalai, o lau toe faaopoopo atu lena.

**FOFOGA FETALAI:** Malo faafetai. O le a tuuina atu le fesili...

**Tofa Olo Fiti Afoa Vaai:** Lau Afioga i le Fofoga Fetalai leaga o lea sa taua lou igoa e le Afioga i le Palemia ina ne i faitau sese le atunuu i le saunoaga a le Palemia. O le mea moni lava lau Afioga, o nei mea o fualaa faasaina, e tatou te le mafaia ona tatou iloa po o ai o o atu ma latou. O mea uma lava so o se falekalapu e tulai ai tulaga faapena. E le iloa mai e matou... sa i ai lau fale kalapu. E le iloa e i latou e ona falekalapu po o ai e alu atu ma mea ia. O le faigata ia ona tatou iloa o tulaga faapea, a o le tulaga sa i ai le pisinisi foi lea sa i ai i o pei ona taua, e le faatau ai ni mea faapena, e matua sa i lau tulafono. Na o le pau lava le mea e maua ai, na o taga aisa ae le maua ai foi ni aisa. Ma le faaaloalo.

**FOFOGA FETALAI:** Malo. Ia, o le a tuuina atu le fesili. E i ai se isi faaopoopoga a le Minisita po o lea ua kava uma e le Afioga i le Palemia?

**Afioga Hon TIALAVEA FEA LENIU TIONISIO HUNT:** Faafetai i lau Afioga i le Fofoga Fetalai. E leaga o lea sa taua e le sui usufono le... O le tulaga lea ua i ai i le taimi lenei le Liquor Board, ou te talitonu o lo o lelei e o lo o galulue ai. O le taimi lenei e le o issue ina se laisene mo falepia uma lava i le taimi lenei, e totogi le latou... ona o lea e fai conditions a le liquor board, e amata nei ona ou alu atu saina loa laisene ua uma ona toe faafou uma

conditions o laisene nei. O bar la ma night clubs, aua e ese le bar ese night clubs o lea ua i ai i lalo conditions na.

O security e tatau ona maua se faamaoniga o mea sa aoaoina ai i le Ofisa o Leoleo. E le tatau foi ona security se isi sa convicted muamua. O le faalavelave o faafitauli o lea matou te iloa ona o tagata o aiga o owners ia e nonofo ma faa-security ae le malamalama i le vaaiga o tagata pe a onana, e sili atu le worse o le aualii na i lo le au onana lava la e i ai. Ma o lea e ave le faamalosi, a i ai le faafitauli e le mafai ona latou... call lea o le Ofisa o Leoleo, ma o lo o i ai foi le Komesina i le matou Komiti lenei o le Liquor. O faamaumauga lava ia ma... ae faafetai i faamaumauga a le Ofisa o Leoleo lea na fai ai conditions o laisene fou ia o le a issue atu e amata atu i le vaiaso lenei. O maluu uma sa i ai o lea e maua uma lava faamaumauga ma le ituaiga fagu malosi, o le vailima, o le taula, o lea na aafia uma i i. Maimau pe ana faapea e mafai ona... a molia atu loa se isi i tulaga ia, e tatau lava ona tui le toto ae ave e siaki i uta i le falemai ona e le mafai ona iloa po o le a le ituaiga oo lea ua oo i ai le ituaiga matautia, e masalomia lava o lo o aafia i drugs, ae le mafai ona... se i vagana ona tui le toto ona faatoa iloa sao lea o lea e aafia ai ma aisa i mea ia.

Lau Afioga i le Fofoga Fetalai, faafetai mo fautuaga, taatia mai o le a toe tagatagai i ai le Komiti Faafae o le Ava Malosi pe a pasia atu le tatou Tulafono Tau Faaofi lenei.

**FOFOGA FETALAI:** Se i toe tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, na o le pau lava lea o le itu lea ua e toe taua se i toe silasila ane lava i ai le Komiti i le mataupu lea, tui le toto. Afai e faamaonia le manatu lea, ia tasi lena teuteuga e tuu i totonu o le Tulafono ina ia empower ai leoleo e faatino loa mea ia. O aso la i tama foi ia, na ona tupu lava o le mea, faaoga loa le faautautaga tatau. Na ona tupu lava o le mea fai mai, se i tilotilo muamua i le Tulafono. O le mea lena ua tele ai mea e tau fufulu ona o le toe tilotilo muamua i le Tulafono. A o le tulaga lava ia, o le faautautaga tatau lava le Tulafono silisili i mea uma. E mo le faia o le mea amiotonu e tatau ona fai ae le toe faatali. Leaga o le Tulafono lena o lo o i le Tusi Paia, o le tagata e iloa le mea e tatau ona fai ae le faia, o le agasala lena i luma o le Atua. O le Tulafono o la e aumai i totonu o le Tusi Paia, faaoga le faautautaga tatau.

**FOFOGA FETALAI:** Malo faafetai. O lea ua manino ma ua faapena foi ona atoa le tulaga o le faamalalamalama a le Malo e tusa ai o lenei Tulafono Tau Faaofi.

*Na faamaonia le lafo ma faitauina le Tulafono Tau Faaofi e Fuafua Tatau ai le Ava Malosi 2018 i lona faitauga faalua.*

**FOFOGA FETALAI:** E fuafua Tatau ai le Ava Malosi 2018 i le Komiti o le Vaega tau le Tamaoaiga mo le iloilo ma toe lipoti mai ai i le Fono Aoao.

**TULAFONO TAU FAAOFI O FANUA MA SUAFA 2019**  
– faitauga faalua.

**FOFOGA FETALAI:** Tulai mai lau Afioga i le Minisita mo Faamasinoga.

**Afioga Hon FAAOLESA KATOPAU T AINUU:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Fanua ma Suafa 2019 i lona faitauga faalua ma ou te fia tautala faamalamalama i ai.*

*Faaluaaina le lafo e le Minisita mo Aoga, Taaloga ma Aganuu ma le Minisita o Tupe.*

**FOFOGA FETALAI:** Talu ai ona o lea ua tatou taunuu i le tatou malologa masani, o le a saunoa faamalamalama le Minisita mo Faamasinoga e tusa ai ma lenei Tulafono pe a toe foi mai i le tatou malologa masani.

*Na faataatiaese Galuega a le Fono Aoaio Faitulafono i le itula e 10:43 i le taeao ma toe faaauau i le itula e 11:20 i le taeao.*

**FOFOGA FETALAI:** E faia le tatou malologa ua uma ona faaluaina le lafo e faitauina le Tulafono o Fanua ma Suafa 2019. Ia ae o le a talia le saunoaga faamalamalama a le Afioga i le Minisita pe a talii mai le tatou galuega i le maea o le tatou malologa. Ma lou faaaloalo ou te tapa lau Afioga i le Minisita mo lau saunoaga faamalamalama.

**Afioga Hon FAAOLESA KATOPAU T. AINUU (Minisita mo Faamasinoga):** Lau Afioga i le Fofoga Fetalai, faapea le Afioga i le Taitai o le Maota, faapea sui usufono mamalu o le Maota leni, ae a le faafogafoa mai a Samoa i ona tulaga faalupe. Afio foi le Ao Mamalu O Le Malo, ma Sui o le Fono a Sui Tofia, tapuaiga a Samoa aua Aiga ma Tama, Tama ma Aiga, faapea le Usoga a Tumua ma Pule Ono i Salafai.

**FOFOGA FETALAI:** Faamolemole, ou te faauilavea i lau Afioga i le Minisita o lo o saunoa, ma lou faaaloalo ou te faamalulu atu i le Afioga i le Taitai o le Malo, o lo o i ai le lafo, tapa lau Afioga i le Palemia le Taitai o le Malo i se lafo.

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai ona o le taua o le faasologa o mataupu o Pepa Galuega mo leni aso, ma e ogaoga Tulafono o lo o feagai ma le Maota nei. O lea lava ua faafogafoa mai Samoa i le taua o le fefaaaliaiga o taofi i a outou Afioga i sui usufono mamalu o le tatou Maota nei. Ia ma e le soona faia foi ni Tulafono, e mafua ona fai Tulafono o le pui puiga lea o le soifua saogalemu o tatou tagata.

E i ai lava isi fai mai ua tele nei mau Tulafono, o le mea lea ua solitulafono ai tagata o le saga fai o nei Tulafono. Ae o le agaga tonu lena e le mafai ona nofonono le Malo, e tatau ona mataalia pea i auala eseese e pui puia ai le soifua manuia o tatou tagata. O le ala foi lena e le manofonofo ai ia Afioga i

Minisita, Sui Palemia ma Minisita Lagolago i le vaavaai pea vaavaai pea i tulaga e tatau ona toe teuteu ai nisi o Tulafono, aemaise o vaega ua mataituina e tatau ona toe tapue atili Tulafono ona o le tele o soligatulafono fou ua aliali mai i lo tatou atunuu e afua mai i le soifua o tagata i fafo.

O le mea la lea e tatau ai ona faagasolo pea ia le tatou galuega, seia oo lava ina maea e pei ona faatulaga i le pepa o galuega i le aso. E faatu atu ai le lafo i lau Afioga i le Fofoga Fetalai e faaauau ia tatou galuega se i maea le ta o le 1:00, ta tonu o le 1:00 malolo, ia ona tatou toe tauaofia ai foi lea i le ta o le 7:00 i le po ananei faaauau se i ta le 11:00, ia atonu e oo atu i ai ua maea uma mataupu e pei ona soalaupuleina, e fuafua e soalaupuleina ma sui usufono mamalu o itumalo. Lau Afioga i le Fofoga Fetalai o le lafo lena.

**FOFOGA FETALAI:** Malo faafetai, ua faatuina mai le lafo e le Taitai o le Maota po o le Afioga i le Palemia, ina ia faapena ona malolo le tatou galuega i le itula e 1:00 i le aoauli nei, ia ae toe amatalia pe a ta le 7:00 i le afiafi ananei seia aulia le itula e 11:00. Ia o le naunautaiga lava ia o le finagalo o le Taitai o le Maota ma le Malo, ia faapena ona faatino ia le tulaga o tatou Tulafono ma le galuega a le Palemene, ia ona lafo foi lea i le Komiti Filifilia o le Palemene i le latou foi pitolaau, ia ona faapea foi lea ona galulue le Kapeneta, ia aua le atinaeina o le atunuu e tusa ai o le Tulafono ua uma ona faataatia ma le Tala Faatatau Faaopopo o le Tupe, ia aemaise foi o Ofisa Sili o Pulega o Matagaluega.

*Na faaluaina le lafo e le Minisita mo Pisinisi, Alamanuia ma Leipa.*

**FOFOGA FETALAI:** Ma le faaaloalo ou te tapa lau Afioga i le Minisita mo Faamasinoga, e faaauau lau saunoaga faamalamalama.

**Afioga Hon FAAOLESA KATOPAU T. AINUU (Minisita mo Faamasinoga):** Faafetai i lau Afioga i le Fofoga Fetalai, tatou te auai faatasi i lenei taeao fou i le viiga ma le faaneetaga i lo tatou Atua, ona o Lona alofa e le mavae i le taitaiina mai o lo outou soifua, ma lo tatou ola i lenei taeao fou, taeao totoa taeao manino aua le Fonousu a Samoa.

Ua taoto i lumamea le Tulafono Tau Faaofi o Fanua ma Suafa 2019 i ona tulaga uma ma lona auililiga. O lenei Tulafono Tau Faaofi o Fanua ma Suafa 2019 o le a suia ai le Tulafono Autu o Fanua ma Suafa i le 1981, o lo o i ai i le taimi nei.

Ia Iuni 2016, na pasia ai e le faaiuga a le Fono Aoao Faitulafono ina ia faavae se Komisi Suesue Faapitoa mo Faamasinoga mo Fanua ma Suafa i le toe lauliliuina o Tulafono ma Faiga Faavae o lo o limataitaiina ai le Faamasinoga o Fanua ma Suafa. E tuuina mai ni fautuaga anoa ina ia toe faaleleia ai le Faamasinoga o Fanua ma Suafa aemaise ai lava Tulafono o faiga faavae o Faamasinoga o Fanua ma Suafa, ina ia atagia ai pulega manino ma ia mautali foi i le mataupu e laga mai.

Ua maea ona pasiaina e le Maota leni ia lipoti ma fautuaga na tuuina mai e le Komisi Suesue faapitoa a le Palemene faatasi ai ma tali a le Faamasinoga i leni lipoti. O le ala lea o le see atu loa o le Malo e ala i le Matagaluega o Faamasinoga ma Tulaga Tau Faafaeina o tulaga tau Faamasinoga, ma le Ofisa o le Loia Sili e faatinoina loa suiga talafeagai o Tulafono ina ia atagia ai le faatinoina o fautuaga e pei ona tuuina mai i le lipoti o le Komisi Suesue Faapitoa a le Palemene.



E pei ona silafia e le mamalu o lenei Maota, o le Komisi Suesue Faapitoa, sa valaauina ai le mamalu o le atunuu, e afifio mai ma tuuina mai so latou sao i le galuega a le Komisi. E le gata i lea, sa valaauina foi le Faamasinoga, ae peitai sa solitu le Faamasinoga ona o mafuaaga sa tuuina mai e le latou tali.

I le tali atu la i fautuaga na tuuina mai e le Komisi, o lea ua tusia ai e le Malo le Tulafono Tau Faaofi o Fanua ma Suafa 2019 ina ia teuteu ma suia ai loa le Tulafono o i ai nei, Tulafono o Fanua ma Suafa 1981. O nisi o fautuaga a le Komisi sa tuuina mai i le isi Tulafono Tau Faaofi, e pei o le Tulafono Tau Faaofi o Komisi o Faamasinoga, lea o lo o taoto nei le teuteuga o le faavae i le Palemene nei.

O nisi la nei o suiga tetele o le Tulafono Tau Faaofi o Fanua ma Suafa 2019 e pei ona fautuaina e le Komisi Suesue mo le pasiaina aloaia e lenei Maota:

1. O le faatulagaga o Faamasinoga o Fanua ma Suafa. O le faatulagaga e pei ona tuuina atu, e tusa ai ma le fautuaga a le Komisi Suesue o Faamasinoga mo le uluai suesuega:
  - (i) O le faamasinoga mo le uluai talosaga muamua ma le faamasinoga o le talosaga mulimuli a le Faamasinoga o Fanua ma Suafa.

O lea faatulagaga o le a aloaia ma amanaia ai tulaga faapitoa ma le maualuga o le Faamasinoga o Samoa mo ona fanua faale-aganuu ma ona suafa matai, ina ia tutusa le faataua ma le aloaia e pei o mataupu e tuuina atu i le Faamasinoga o Soligatulafono. A o lenei faatulagaga, o le a atagia ai le taua tele o Faamasinoga Samoa i totonu o le lio o faamasinoga. O le a avanoa ai le atunuu e toe iloilo ai se mataupu ua uma ona fai i ai se faaiuga a le Faamasinoga o talosaga pe afai e ausia ona tuutuuga maoti lea e faaperetaniaina o le miscarriage of justice muamua po o le error of law.

2. Afai e maea le iloiloga a le Faamasinoga o talosaga e le faamalieina lava se itu o faamasinoga, a mafai ona ausia se tasi o mafuaaga nei e lua ua ou taua, o le avanoa loa lea e agai ai le Faamasinoga Maualuga o Fanua ma Suafa po o le tau faaperetaniaina o le Final Court of Appeal mo se faaiuga o lana mataupu.

O lona uiga o le a le toe sulufai le atunuu i le Faamasinoga Maualuga Supreme Court, e ala atu i le auala foi lea e masani ai nisi o tatou, o le traditional review. Ae o le a toe saili lava e le Faamasinoga o Fanua ma Suafa le final court of appeal lava ia le tulaga i se faaiuga o le a tulai mai pea.

O le faiga lenei o le a mafai ai ona ausia ai le isi fautuaga taua a le Komisi Suesue ina ia tutoatasi le Faamasinoga o Fanua ma Suafa ma fai ai lava e ia iuga o ana lava faamasinoga, e le toe manaomia le toe saili pe suesue e se isi Faamasinoga e ese mai i le Faamasinoga o Fanua ma Suafa. Ma o le a tuu mai foi i luma o le Palemene nei ia teuteuga talafeagai, o le Faavae o Samoa mo lea faamoemoe ina ia tōgatasi le futia ma le umeleø e pei o lea muagagana.

O le a faamausaliina ai le le mafai e se Faamasinoga ona toe iloilo ina ni faaiuga a le Faamasinoga o Fanua ma Suafa e pei ona i ai i lalo o le vaega 71 o le Tulafono o Fanua ma Suafa 1981. O le isi suiga o lo o i ai nei i le Tulafono Tau Faaofi, o le faatulafonoina lea o le taimi faatapulaa e tuuina mai ai se faaiuga tusitusia a le Faamasinoga. I taualaumaga o suesuega a le Komisi Suesue, o lo o maua ai le tele o finagalo faasea a le atunuu, i le umi ona faatali faaiuga tusitusia aua latou mataupu. O isi mataupu ua malolo litaea faamasino sa latou faatautaia ia mataupu ae le i i ai ia ni faaiuga tusitusia. Ma o se tulaga maaleale tele lea faatinoga ma ua tataua ona

faatulafonoina ia le taimi e tatau ona tuuina mai ai se faaiuga a le Faamasinoga.

O le isi tulaga lau Afioga i le Fofoga Fetalai, o lo o i totonu o lenei Tulafono Tau Faaofi o le faatulafonoina lea o le tauaaoina mai e itu o le faamasinoga, o faafanua o se mataupu e agai i ai le sailiga o le pule o se fanua faale-aganuu ma ona tuaoi, ua maua i saililiga a le Komisi Suesue, o mataupu tau fanua faale-aganuu, e i ai feteenaiga i faafanua e aumai i le Faamasinoga ma faafanua o lo o teuina e le Matagaluega o le Punaoa Faalenatura ma le Siosiomaga. O isi foi mataupu ua fai le faaiuga a le Faamasinoga i luga o le isi fanua, ua maea i ai faaiuga a le Faamasinoga, ma ua maea foi ona fua faale-tulafono. O le mafuaaga lea o le faamalositia ma faatulafono loa le tauaaoina mai e itu auai o se faafinauga i fanua faale-aganuu, i le Faamasinoga o fuataga, o fuataga o so o se fanua o lo o aafia ai talosaga i luma o le Faamasinoga.

Lau Afioga i le Fofoga Fetalai o le isi vaega o lo o i totonu o le Tulafono lenei, ua faamalositia ai taiala o faatinoga o galuega faale-faamasino i le taimi o sailiga a le Faamasinoga. O feteenaiga o tiute faale-faamasino e faatautaia ia lea mataupu ma lea mataupu. O le faamalositia o tupe totogi mo le tolopoina o lea mataupu, aemaise piitaga o se faamasino i se mataupu. Ua toe faamanino mai foi le tulaga faatulafono o mataupu e soalaupule, ae le i faatinoina le suesuega o le faamasinoga.

O nisi vaega o lo o agai i ai le Tulafono Tau Faaofi o le faatulafonoina o le faatinoina o saofai faale-aganuu, o tiute tauave a sao o le aiga, tiute tauave o Sui o le Malo, o tiute tauave o le Resitala o le Faamasinoga, ina ia manino ma maioio lelei le faatulagaga o nei tiute ina ia aua ne i i ai nisi faaletonu e toe tulai mulimuli i le faatinoga o saofai faale-aganuu.

Lau Afioga i le Fofoga Fetalai, o tulaga ia o le aoatelega o lenei Tulafono Tau Faaofi ua taoto nei i lumamea, o lo o manino mai ai faatinoga faafautuaga uma sa tuuina mai e le Komisi Suesue a le Palemene mo Faamasinoga o Fanua ma Suafa. E le gata i lea o le vaavaai o le Matagaluega i tulaga ogaoga, e tatau ona fai i ai nisi suiga talafeagai, ona ua le toe talafeagai lenei vaitau ona o le Tulafono o lo o i ai i le taimi nei.

E pei ona ou taua i le taimi ua sola, o lo o i ai le Tulafono Tau Faaofi o le Komisi o Faamasinoga, o le a agai mulimuli mai mo se iloilogaga ma se faamaoniga a le Maota. E agai tonu lea filifiliga i le filifiliina o faamasino. O le faatautaia o le iloilogaga o tiute o faatino e faamasino, performance review ma le iloilogaga o faasea mai i le mamalu o le atunuu, e agai tonu i se faamasino e aafia ai le siitia po o le faamalolo o se faamasino ona o se mafuaaga tatau.

O le a silasila foi lenei Tulafono Tau Faaofi i faamanuiaga talafeagai mo faamasino, e ala i totogi ma nisi faamanuiaga e agavaa i ai. E pei ona ou taua i le taimi ua sola, o nei suiga ua taoto nei, sa faavae i luga o galuega fita sa feagai ma le Komisi Suesue faapitoa a le Palemene mo faamasino o fanua ma suafa. E toe faamauiina ai le agaga faafetai tele i lau Afioga i le Taitaifono ma sui usufono mamalu o le Palemene sa auai i lenei Komisi Suesue, ona o la outou galuega fita sa outou feagai ai. E pei ona manino i upu tomua o lenei lipoti, le saunoaga a le Taitai o le Maota, òe le faigofie le sailiga o le amiotonu, aua e ola faatasi lava le saito ma le titaniaö.

O le nonofo lelei o aiga ma nuu, e faamoemoe lea i le lelei faafae o taualumaga ma suesuega ma faaiuga fai a le Faamasinoga, aua o faaiuga fai a le Faamasinoga a Fanua ma Suafa, ua taua faaperetaniaina, Judgement... O

Iona uiga e aafia ai e auai i itu o faamasinoga, e aafia ai i latou e le i auai, e aafia ai foi ma latou e le i fananau mai. Ia manuia tele le soalaupulega o lenei Tulafono Tau Faaofi o Fanua ma Suafa 2019, ia fesoasoani mai le Atua i le felafalafaiga a le Palemene i le aso, soifua ma ia manuia.

**FOFOGA FETALAI:** Malo, tulai mai le Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, ou te faaopoopo atu i le saunoaga a le Minisita mo Faamasinoga e ana le Tulafono.

Pe a toe tomanatu i le Tulafono lenei, o le Tulafono na afua atu i le Maota lenei. O le tatou Tulafono, pe a ma le 2 tausaga talu ai, na laga ai se mataupu taua tele, i totonu o le Maota lenei, ona o le faafitauli lea e faafeagai ma le atunuu, i le silia i le 300 talosaga apili, o lo o taatitia e le i faia i ai ni faaiuga, ua le mautonu ai le itu faamasinoga a le atunuu.

E le gata la i Tulafono i le tulaga o Faamasinoga faale-aganuu, ae faapena foi le tulaga o lo o faatali ai le toatele i faaiuga o faamasinoga faasolitulafono. O lea foi e tele iuga o lea e faatali i ai tagata ua aafia. Ia o le matafaioi tonu lena a le Faamasinoga, ae o le faalavelave, ua leiloa e le atunuu po o fea a o i ai. Ua leiloa e tagata ua aafia i le faamasinoga faasolitulafono po o le a le mea ua oo i ai, po o le a tonu le mea lea e taoto ai le faamasinoga. E na o le tolo ona o le tulaga o lea excuse, o lea excuse e aumai pea e le Faamasinoga, aemaise o faamasinoga ua uma ona fai, ua fia tausaga talu ona uma na fai, ae leai ni faaiuga tusitusia. O mea ia i isi atunuu, ua faatulafonoina, le tulaga foi lele aua ne i silia i le masina po o le lua masina ua kiliva le faaiuga o se faamasinoga ua uma ona fai. A le kilivaina loa le faaiuga, faamavae. O le mea lena e fai e le faamasino, faamavae.

O lea la ua aumai e tagata i le Malo, ua leiloa po o fea a sulu i ai, ia ona taumafai atu lea o au nei o le Taitai o le Malo, e faamanatu i faamasino ia latou tiuteo lea e faalavelave mai le atunuu, i le Pule Faatonu, ae e le o se matou matafaioi lea. Ia ae ou faalogo atu, ua faitioina le aiatatau o le Malo. Ae o le mea lea e taumafai atu ai, ua leiloa e o tatou tagata, le mea o le a sulu i ai. O ai o le a sulu i ai? Sulu loa i le Palemene.

Ae ua uma foi ona faataoto i totonu o le Faavae o le Malo o Samoa, le faataatiaga o le Pule Fefaatauaigai, the Divisions of Power, i lala e tolu o le Malo. Executive le Pulega, lea e faauluulu i le Palemia, o le Faamasinoga e faauluulu i le Faamasino Sili, ia ma le Palemene e faauluulu i lau Afioga. O malosi ia e tolu, ua uma ona vaevae i lalo o le Faavae, e agai e le isi Pule le isi Pule. A faaletonu loa le isi Pule, agai loa le isi Pule i le faamanatu vaai lau mea lena e sese. O le balance of power lena, lea e i totonu o Tulafono Faavae o Malo faatemokarasi uma lava o le lalolagi. O le Pule a le Faamasinoga, Pule a le Palemene, ma le Pule a le Pule Faatonu.

O i ina i le vaeveaga lea e tolu, e puiyai ai le temokarasi a Samoa, aua ne i fia pule se isi, aua o le mea na sau ai, o isi ituaiga pule, pule o le tupu, lea e tatou te iloa lelei lava mai le taimi o Solomona, ia ma le taimi o Tavita, e pule lava faasoloatoa. Ia faasolo mai loa oo mai i Peretania o i ina na amata mai ai ona fetauai, tau le Palemene ma le Tupu. O le a le mea na oo i ai? Faasee loa le Tupu i luga nofo nofo ai, na o le nofo ai lava e oo i le faavavau na o le nofo nofo lava ma matamata. A o mataupu lautele, taoto mai i le Palemene, lea la na oo ai ina fetauai ai le Malo o Farani. Faatu loa foi ma le

Malo o Amerika faataoto ai loa Pulega nei e tolu, lea e sosolo ai lava temokarasi uma o le lalolagi e aofia ai ma tatou, Niu Sila ma Ausetalia. O le vaevaega lea e tolu, ona o le tulaga lenei e tuu loa se fasi pule i se lima e toatasi po o ni nai tagata, faaaoga sese loa.

O le ala la lena o lea e ala ai ona taoto pulega ia, ma o lea la ua oo i le taimi e taoto mai ai faalavelave ia, o le a la le mea e fai e le Palemene? O le mafuaaga lea na ala ai ona faatu le Komiti lea. O le Komiti e suesuea le malosia lea e i totonu o le Faamasinoga ma le tulaga ua faaaoga sese ai, e i ai le upu e faapea, "the justice delayed, is justice denied" O lona uiga o faamasinoga tonu, e faatalitali pea, faatalitali pea, faatalitali pea o i ina tonu e fanau mai ai le le amiotonu.

O lona uiga e le mafai ona nofonofo ia sui o tagata lautele, le Palemene lenei, ua tataua loa ona faaaoga loa e le Palemene lenei ia aulape o lea e i totonu o le Faavae. O a aulape ia? E mafai e le Palemene lenei, i lana faaiuga 2/3, ona aveese se faamasino e le amiotonu. E faapena foi ona faaaoga e le Palemene lenei, i le 2/3 ona aveese se Palemia le amiotonu. O mea ia o aulape ia o lea e taoto i totonu o le pule lenei a tagata lautele a le atunuu atoa, lea e i totonu o le Palemene ina ia maua le 66.3, 2/3, 66.6 po o le 66.7% o le Maota lenei. O i ina la, lea na faavae ai loa le Komiti lenei o le a agai loa le Palemene e apo aulape ia, o lo o i totonu o le Faavae mo se uluai taimi, ma e soo se mea lava e tupu mo se uluai taimi, e faatei tagata.

O lea la ua faatu le tatou Komiti a le Palemene o le a amata ana galuega, a ua faateia ai le Faamasinoga. Fai ai loa ma le latou faaiuga, e le o mai e fai ia ni a latou molimau, i le fofu lea o le a agai i ai le Palemene, e fofu ai faafitauli ia e feagai ma o tatou tagata lautele, e leai se isi mea e tua i ai. O tatou o sui usufono o le atunuu, afai ua vaivai le isi lala, o fea le mea e o i ai tagata? Toto mai loa i sui usufono o le atunuu, na mafua ai ona palota mai tatou uma i totonu i i.

O le mea la lea, a tatou o mai i totonu i i, fai ma le amiotonu fai ma le le fefe ia tatou galuega. Ia lea la ua faateia le Faamasinoga, le o mai loa. Ou te faafetai i le Komiti, Taitaifono ma le Komiti i le lava o le tofa, na alu lava le galuega e le i taofia. Faatoa iloa mulimuli ai e le Faamasinoga, e oo lava i le Faamasino Sili o le mea na amata mai ai nei mea faatemokarasi na samania e le Palemene i Peretania, sa i ai foi si ona ia tei. Ae na iu lava ina alu ona o faavae ia o atunuu malamalama. O Ausetalia e faafia ona samania ia latou faamasino, e o mai se i faafeagai ma le Komiti o le Palemene, ona o i lea e i ai le power maualuga e samania ai soo se lala, ua le faamaoni i le faatinoga o ona tiute. Ua ala ona oo i ai ia au faamatalaga ina ia malamalama lelei, aua le faafogafoga mai e le o se Tulafono na tupu mai i fafo, a o le Tulafono na tupu mai i totonu o le Palemene lenei. Na tupu mai i totonu o le Palemene ona o le tagisa mai o tatou tagata, ua leiloa le mea a sulu i ai. Ia lea la ua taoto le lipoti o le Komiti, o lea foi ua malamalama ai foi ma le Faamasinoga ma aumai ai loa ma latou tali, o le ki lena o le Tulafono e tupu mai totonu o le Palemene lenei, e tupu mai totonu o le Palemene ona o le tagisa mai o tatou tagata ua le iloa le mea a sulu i ai. O lea la ua taoto le lipoti a le Komiti, o lea foi ua malamalama ai foi ma le Faamasinoga i le agaga moni, ma aumai ai loa a latou tali, e ui ua tautuauega.

O le Tulafono la lenei lau Afioga i le Fofoga Fetala'i e tataua ona toe foi i o i le Komiti pe a uma le soalaupulega, e toe tilotilo i ai le Komiti ma toe valaau le atunuu lautele, toe valaau ai foi ma faamasino e o mai e fai ni a latou

molimau. Ua maaleale tele nei aso o le fai atu lava o lea mea i totonu o le Palemene fai mai ua a ma a ma a, ae o lea e tuu avanoa le Palemene lenei.

O lona uiga o saunoaga e fai i le Tulafono lenei, o saunoaga e fofo ai le mataupu lea. E le o ia i tatou se tomai faapitoa, ao lo o i le Atua le amiotonu ma le tomai na te musumusuina i tatou. Ou te le iloa foi pe ua faafia ona tatou taua le suafa o le Alii. O lo o manino lava Afioga a le Alii. E so o se mea e tautau ai lona suafa pe toalua pe toatolu, e lotolotoi ai foi i totonugalemu. O lo o afio i le mea nei le Atua o le poto Silisili Ese, na te aumaia le tofamamao. E lauliliu le Tulafono lenei ona o le Tulafono lenei e pei ona saunoa le Minisita, o le Tulafono e aafia ai o tatou tagata nei ma e lua latou e lei fananau mai.

Lau Afioga i le Fofoga Fetalai, o le toe faaopoopo atu lena. O le Tulafono e le o se Tulafono a le Malo, o le Tulafono na tupu ae i le fautuaga ma finagalo na faaalua i le Komiti faapitoa na tofia e le Palemene lenei, na o mai uma i ai le mamalu o le atunuu, e faaali ai o latou finagalo. Ae a uma foi ona soalaupule, e toe foi foi i le Komiti e toe tuu atu le isi avanoa tele lava mo le atunuu atoa e toe gasolosolo mai foi e toe faaali o latou finagalo. Lau Afioga i le Fofoga Fetalai, o le faaopoopo atu lena.

**FOFOGA FETALAI:** Malo faafetai, o lena ua faafofoga le paia o le Palemene aemaise o le faafofoga tapuai mai a Samoa. I le maa faafuagalua na afua ai lenei Tulafono ona tagofia e le Palemene. Ma e le i faigofie lea tulaga. O lea foi ua malele ma taua le Komiti ma tulaga e pei ona alofaiva i ai le Palemene i le fesootaiga o itu faatauagai, o le tulaga lena ua manino. Mo sui usufono mamalu o le Palemene e fia saunoa i lenei Tulafono taua aemaise o le faafofoga tapuai mai a le atunuu. O le mea lea, o lea ua tulai mai le sui usufono....Malie le sui mamalu mo Vaimauga sei tuu atu le avanoa lenei i le sui usufono mo Salega i Sasae.

**Tofa OLO FITI AFOA VAAI:** Lau Afioga i le Fofoga Fetalai, ua maua so matou avanoa e avatu ai foi nai motugaafa ma na i tuualalo e tusa ai ma le Tulafono. Lau Afioga i le Fofoga Fetalai ua manino i lenei itumalo ia le folasaga a le Afioga i le Minisita, ma e momoli atu ai le faafetai tele i lau afioga ma le paia o le Matagaluega.

O lea ua i ai nai suiga, e i ai lava le talitonuga, o le a fai lea ma toomaga o lo tatou atunuu i le tele o faafitauli e tulai mai i le va o le Faamasinoga ma le atunuu. I le tulaga foi lea ua manaia ai, o lea ua manino le tau tuueseesega o le Faamasinoga o Fanua ma Suafa ma le Supreme Court. Ae tataua lava ona faataatia atu so matou manatu leaga e utiuti le taimi ae feololo lava matou mataupu, ae o le a faapupuu atu lava lau Afioga i le Fofoga Fetalai. Sa i ai lava le manatu o le a aumai loa faatutoatasi. Aua o lea ua tilotilo atu lava i foliga o le faataatiaga o faamasinoga i lo tatou atunuu, o lea e ese lava le Faamasinoga i lalo i le Peresetene ma le Faamasinoga i lalo o le Faamasino Sili.

Na o se fautuaga e taoto atu i ina aua le agai atu i luma. O le isi vaega lau Afioga i le Fofoga Fetalai, se i toe silasila ifo lava lau afioga i le Tulafono lenei. O lea ou te tilotilo atu i le Tulafono o le Faamatuina atu o Fanua Tau Samoa, o lea ua i ai le feteenaiga i le Alienation of Customary land. O la e manino i ina le le toe tuu atoa o se mataupu i le Faamasinoga o Fanua ma Suafa. Ae o lea ua ou tilotilo atu i le Tulafono lea, o lea foi ua toe agai i ai. E na o se fautuaga e toe silasila ifo i ai lau Afioga i le Minisita.

O le isi vaega lau Afioga i le Fofoga Fetalai, o le tulaga lea o le faaaogaina o loia. E le fai atua sau faamatalaga aua a faaoga....o afioga i loia, e pau lava le mea la e i ai o le sue o lana tupe. E tele foi avanoa e taumafai ai iaí , ina ia malo le itu e tu ai. Ae i ai lava lou popolega lau Afioga i le Fofoga Fetalai, aua e eseese le malolosi o aiga. E oo loa i le tulaga lena, e le gafatia e se aiga lima vaivai ona i ai se loia e tu mo latou. A oo foi ina faatino galuega i totonu o le Faamasinoga e leai se leo, e na o le faamasino lava ma loia o le a tu i mataupu faapenei.

O le isi vaega lau Afioga i le Fofoga Fetalai, o le tulaga lea o le tofiaina e le Faamasinoga i a latou faaiuga fai, o le tofiaina lea o matai e fai mai e latou faaiuga, "ia o le matai lea e fia au matai". O le faataitaiga lea o le a fai atu, a faapea nei o Olo Leaeasefili lea e faamasino, aemaise o le mataupu suafa Tuilaepa ua tau fua le suafa tulou. A ou fai atu nei, lima suafa Tuilaepa i i, lua i lua i, ailoga e manaia i se faalogologo i paia o le aiga. O le a pule mai i tua measina a le aiga. Ao lou lava talitonuga lau Afioga i le Fofoga Fetalai, e tuu pea i aiga, e o latou e soalaupule a latou mataupu. Afai lava po o le a le umi e soalaupule e le maua se tasi, o le latou lava lea faitalia. O la e i ai le tofa, e le fesiligia le tofa ma le uta i paia o aiga. Ae manumanu lau Afioga i le Fofoga Fetalai, i le faia e le Faamasinoga o faaiuga a aiga taitasi. E pei o nai vaega na lau Afioga i le Fofoga Fetalai. E na o se tuualalo lava, ae pule lava le Afioga i le Minisita ma le tofa i le mea e agai i ai, aua se manuia lautele o le atunuu i lenei Tulafono taua. Ma le agaga faaaloalo.

**FOFOGA FETALAI:** Se i tulai mai le sui usufono mo Vaimauga i Sasae.

**Afioga SULAMANAIA FETAIAI TAUILILI TUIVASA:** Faafetai i lau Afioga i le Fofoga Fetalai, ao le i faia foi se sao o lenei foi itumalo i le Tulafono Tau Faaofi a le Faamasinoga ua opea i le Maota. E muamua ona avatu le agaga faafetai i le Taitaifono o le tatou aulakapi taitoafitu, o lea sa silasila uma i ai le atunuu i le week end. E ui e lei tau lau o le faamoemoe, ae o lea ua manaia si a tatou au. E pau lava le talosaga i le afioga i le taitaifono se i silasila i ao o tama taaalo, e le matagofie le vaai atu i ulu tavali ma mea o....se i silasila i le taimi lea e o atu ai e fai faamanuiaga a le Malo, o tatou e mamalu....e tasi lea a tatou faalauiloa o le avatuina o.....

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, o lea o le a teuteu le vaega lena o le Tulafono i tamaiti e uumi o latou ulu ma faatupu a latou ava ma fai foi ni a latou fili. Ua mao mai i i le Tulafono si vaega lea. Ae pau lava le mea lau afioga, ou te toe faamanatu atu, o le Tulafono lea, o le Tulafono a lo tatou Maota, lea ua tuu i ai mea ia na aumai e le Komiti. O lona uiga la a tatou talanoa i le Tulafono, o le Tulafono a le Palemene.

O le lipoti a le Komiti lea ua faaupu faaetulafono, ne i te i foi ua tuuai e se isi o le Tulafono a au ma le Kapeneta ma le Minisita, ao lea ua tuu i totonu mea sa o atu tagata ta'u ai i o i le Komiti. O lona uiga na o atu tagata fai i ai, se tuu ia i ai i totonu ia loia. Ae a aumai lava outou fautuaga se i toe tilotilo ane lava i le mataupu lea, i le lipoti a le Komiti. Ne i te i foi ua alu foi se isi o le SSIG ma aumai o le Tulafono fai faamalosi e le Malo ae leai o le Tulafono e afua i luga o molimau na oo i le Komiti. Toeitiiti lava uma i ai le atunuu atoa. E taua suiga talafeagai, ia aua ai ne i toe alu le tolu sefulu ma le fia o

tausaga o faatalitali. E i ai le matou faamasinoga e tolusefulu tausaga o faatali. Aua ne i toe oo i na uumi o faatali le atunuu lenei, a alu atu loa i o le talosaga fai loa ma le faamasinoga.

**Afioga SULAMANAIA FETAIAI TAUILILI TUIVASA:** Faafetai i le avanoa i le saunoaga a le tama o le atunuu po o le Afioga i le Palemia. O le a avatu se motugaafa a lenei itumalo i le tatou Tulafono. E momoli le agaga faafetai, e pei ona ou taua o Minisita ma Minisita Lagolago e aumai i totonu Tulafono e iloa ai o lo o galulue. Aemaise o lau faafetai i le Taitaifono lea o le Komiti sa fanau mai ai lenei Tulafono.

O le Matagaluega lenei o Fanua ma Suafa e pei o le itu lea o tatou faamoemoega faale-aganuu. Ona e le gata i o tatou faasinomaga i fanua aemaise foi o tatou suafa. Ae matau i lenei taeao e na o ni lagona e tuuina atu i le teuteuga o le Tulafono. E pei o lea ua taua e le isi sui usufono lea ia loia, ia e faapena se lagona, o pea loia ia i Faamasinoga faasolitulafono ma luga i ina, ae tuu pea o tatou tagata nuu e faatino lava e tatou. Ona o le isi vaega lea i loia pe a o atu nei, e i ai la tatou Tulafono foi lea, e fesiligia mai e faamasino "E i ai sau aia i le suafa lea", fai atu lea e leai, ia e le talia oe, ao lenei o le a aumai nei loia e faalavelave fua i Faamasinoga a aiga. E pei o le agaga lena o lea e faaopoopo ai, e le gata i le taugata, ae o le a leai ai se uiga sao sa faatu ai lenei foi vaega e faatino lava e faamasino Samoa ma faapena.

O lona lua o talosaga ma le tuualalo, se i silasila ifo i nai o tatou Faatonu ia ua aveese. O nai Faatonu ia e pei o latou ia e lagolagosua i afioga i faamasino, ao lea o le a toe aveese nai faatonu, se i silasila ane i ai i lena vaega.

O le isi vaega lau afioga i le Minisita ma lau Minisita Lagolago ma le Pulega, o si vaega lea i tulaga o fuafanua. O lea o le a tapa ni tatou vaega fuafanua e o e fua fanua faale-aganuu. Ae silasila foi, o tatou fanua faale-aganuu e leai ni pine, e pei o lea e tele ina saunoa lo tatou tama po o le Palemia, e fua i le koko i le niu. Ao lea la e fai mai e o nai aiga e avatu, o fea la a o e fai ai na fuagafanua?, ao a foi tupe e totogi ai fuafanua ia? o le tasi lena vaega. O lona uiga a fai ni faamasinoga e tuaoi ai ni fanua, o lona uiga a le mataala aiga ia e tuaoi ma fanua na, e toe fai atu ua fua mai foi ma latou ia, ao la e...ona o vaega ia i fuafanua. E teena e lenei itumalo le faaaoga fua o...o lava e finau i le silasila a faamasino i le tulaga lea.

O soalaupulega faamolemole, ou te faafetai lava i lea foi faatofalaiga ina ia soalaupule muamua e le i oo i le Faamasinoga. Ao le faatinoga la o le soalaupulega lea e avatu ai le tatalo, se faamolemole e tuu pea i le staff a le Matagaluega, ona o lea e i ai tamalii lea e o atu e faatino, o lou popolega lea. O le a o atu fua latou i totonu matamata ai i iuga o le faamasinoga, ma vaai ai i faila o iuga ae le galulue i totonu o le Matagaluega o Faamasinoga. Tuu pea le auaunaga o soalaupulega e faatino e le Aupaigaluega a le Faamasinoga ona malu puipuia lea. Aua o lea e matau atu e aumai muamua le lisi ae vaai atu, o isi e tu maualuga i totonu o Matagaluega a le Malo, ao lea foi o le a toe faaleelea ma le isi mea e totogi. E uma ae ae fai mai e fia itu, ave le tupe ma e sa faia le soalaupulega. E teena le avatu o tagata tua, fai pea i totonu o le Matagaluega lena auaunaga.

O le poloaiga le tumau, lea e i ai le poloaiga le tumau a le Peresetene, e i ai le poloaiga le tumau a le Resitala. Se ua fetai nei mea o poloaiga le tumau. E fia fesili ai i lau Afioga. O ai le poloaiga le tumau e maualuga po o le Peresetene po o le Resitala? Ae ou te tatalo atu, a faapea e le tumau, aua ne i

toe faia lena mea o le poloaiga aua e le o tumau. Aveese aloaia ai loa i lalo o le tulaga...

O le pulenuu, o lea ua oo le finagalo foi o le Afioga i le Minisita ina ia faamalosia tulaga o faiga matai a nuu. O na i pulenuu o la o lo o tua i ai o tatou afioaga, o i lea e malu ai lo tatou Faigamalo ona e mafua mai i totonu o pulega a alii ma faipule i le mamalu o pulenuu. E le gata i totonu o tamaitai ao pulenuu tama o lo o faatautaia o tatou nuu. Ao lea foi ua toe aumai ma lenei avega mamafa, fai mai e aumai le taimi e tuuina mai ai i totonu ia suafa matai, ae o lou talitonuga, o mea na e pule ai lava le nuu. Aua e i ai isi nuu e fai suafa matai o e mai fafo, e le aumaia la e resitala, ao lea o le a faamalosia e aumai i totonu ia tulaga ia. E pei o na i vaega na, ae a silasila i ai o siitaga ia ua alu nei a tatou, e le o lavea ai pulenuu. Ae a pe a silasila e toe sii ai i totonu ma na i na.....faamanuiaga mo pulenuu.

**FOFOGA FETALAI:** Mo le faasaoina o le tatou taimi. E masalo o lea e manino le finagalo o le Malo, faapea ua maua mai e sui usufono mamalu o le a tatou o e auiliili le Tulafono lenei, a o le Tulafono, o le Tulafono o lea na afua atu i le tatou Palemene, e afua mai finagalo o le atunuu na omai e faaali o latou finagalo faatasi ai ma sui usufono o le Palemene i le Komisi sa faapena ona tofia e ave ma sui usufono o le Palemene e silasila i le itu lea ina ia maua se fautuaga ma se feutanaiga ma le Matagaluega o Faamasinoga. A o lea e matau atu o le a tatou toe see lava e autalaina le tulaga o le tatou Tulafono, a o le tatou Tulafono na afua atu i le Maota lenei. O outou finagalo na afua ai mea ia. O le mea la lea, se i alolofa sui usufono se i tuutuu mai i totonu le saunoaga masalo tatou te aulia ma le Aso Sa... Se i tau fuafua mai faamolemole.

**Afioga SULAMANAIA FETAIAI TAUILILI TUIVASA:** O le a faauma le matou manatu ona o au e saunoa loa le Fofoga Fetalai, e ava tele lenei sui usufono. Ae faafetai i le Taitaifono lea na... e pei o le Komiti lea na up ai ou points lau Afioga i le Taitaifono, lea ua e seei mai lena itu. A o le tatalo, o lou faanoanoaga i le tulaga lea pei ona saunoa le Minisita i le amataga, e le i auai itu o faamasinoga i le vaega lenei o suesuega. O lona uiga e le o atoa i i, ae o lou ia manumanuga i le Maota lenei i lau Taitaifono, a ua le omai loa latou ia e tetee mai le Komiti, o le a le mea na le ave ai i le Tulafono? O lea e i ai tatou, a le auai mai le itu e faaali finagalo i totonu o ni Komiti, o lea e i ai le malosiaga e prosecute ai pe samania ai. Ae pei o lou ia faanoanoaga lena lau Afioga i le Taitaifono ua e silasila i le vafealoai, ae te le silasila i le tamaliiaga ma le paiaga o le Maota lenei sa valaauina ai tatou. O le mea lena, toe pau lava lena o lou lape lena sa i ai, tusa lava po o a, ave pea i le Faamasinoga se i iloa ai. Manuia le Fono lau Afioga i le Fofoga Fetalai aemaise le tapuaiga a lenei Palemene.

**FOFOGA FETALAI:** Malo faafetai. Tulai mai le Minisita mo Faatoaga ma Faigafaiva.

**Tofa Hon LOPAO NATANIELU MUA (Minisita mo Faatoaga ma Faigafaiva):** Lau Afioga i le Fofoga Fetalai, na o lou fia tali puupuu atu lava i le saunoaga a le sui usufono. E sao lava le sui usufono mamalu i lona finagalo pei ona faaalua. Ia leaga o le Komiti lenei, e le na o au le Komiti sa i ai, ae leaga e loloto tele le tofa ma le faautautaga a le Komiti sa i ai. Silasila foi, o le Faamasinoga lea o tatou tu ma aganuu, o mataupu tau Samoa. Ae a



outou silasila la i le mea o le Samoa, e ola i le vafealoai. Lea e i ai le taimi lenei. O le taimi lenei a tatou tauaimaa i le Faamasinoga, lea sa tatou avea i ai le mataupu lea i le Faamasinoga e afifio mai e tali mai, ae sa le mafai ona omai, sa sisi lava le latou la ma fai lo latou finagalo, ia ona matou faapea lea ma le matou Komiti, ia e faigata tele le mea ona o le tatou aganuu ma le tatou soifua faa-Samoa se i vagana e le Samoa lau Afioga i le sui usufono ona tatou mafaufau lea i nisi o tulaga foi lea pei ona i ai le samania.

Ae pei o le agaga lena sa matele i ai le finagalo o le mamalu o le Komiti e faigata tele le tatou va ma le tatou avafatafata. Ma le faaaloalo e pei ona faapupula laitiiti atu le mataupu lea. Faafetai i lau Afioga mo le avanoa.

**FOFOGA FETALAI:** Ia, ou te manatu o lea ua maea ona faamanino itu o lenei Tulafono Tau Faaofi e pei ona taumafai atu ai, ae... O le Tulafono foi ia e faigofie lava pe a tatou tuuina atu loa i le Komiti mo nisi o fautuaga aua pei lava foi ona maa faafuagalu ai lenei Tulafono i totonu o le Palemene. Ae o le a tuu atu avanoa i sui usufono ia e toatolu, toafa, toalima, ae faamolemole e faapuupuu mai. Faamolemole faapuupuu mai saunoaga o tatou Tulafono na afua atu i i.

Ia se i saunoa mai le sui usufono mo Sagaga le Usoga.

**Susuga SEIULI UELIGITONE SEIULI (Sagaga le Usoga):** Faafetai mo lou avanoa lau Afioga i le Fofoga Fetalai. Talu ai ona o lea sa taua e le sui usufono lea mai Vaimauga le fuaina o fanua, ae o au lea sa ou fesili i le tatou semina foi lea na mavae atu nei pe i ai se auala e mafai ai ona fuaina fanua tau Samoa. O lea na saunoa nei le sui usufono lea mai Vaimauga faapea e mafai lava e le fuafanua ona alu atu ma fua sese ni fanua foi lea e le o sona fanua po o fanua foi o lea ua i ai le poloaiga a le Faamasinoga e fuaina. Peitai ane o au lea sa ou fesili, sa saunoa mai le Ofisa Sili o Pulega o le Matagaluega o Faamasinoga, aua o lea sa ou faapea atu i le Afioga i le Ofisa Sili o Pulega, e lua lava mafuaaga e mafua ai ona fua se fanua tau Samoa, o se fanua e fia lisiina atu ma se faaiuga a le Faamasinoga. Ae sa tali le Ofisa Sili o Pulega, e mafai ona fuaina ona avatu lea i le Ofisa o Punaoa Faalenatura ma le Siosiomaga mo nisi galuega e faia a le Ofisa o le Punaoa Faalenatura ma le Siosiomaga.

Peitai ane sa ou faapea ai o se suiga fou lea sa saunoa mai ai le Ofisa Sili o Pulega, ae o lea sa maua mai faamaumauga i le Ofisa o Punaoa Faalenatura ma le Siosiomaga, e le mafai. E le mafai lava, na o le lua mafuaaga e mafai ai ona latou talia se faafanua e mafai ona resitalaina i le Ofisa o le Punaoa Faalenatura ma le Siosiomaga, na o se faaiuga a se Faamasinoga ma se fanua e fia lisiina atu. E pei o le ala lea o lou tulai atu, ona o lea sa saunoa le sui usufono lea na alu atu lava le fuafanua fua pepelo nisi mea, e le mafai se i vagana lava ua i ai se iuga a le Faamasinoga, po o se fanua foi e fia lisiina atu ona faatoa mafai lea ona alu atu le fuafanua e faataunuu lea faamoemoe.

Ae manaia lana saunoaga sa saunoa mai ai i le poloaiga le tumau. E i ai foi si ou le malamalama tele i le poloaiga le tumau lea pei ona saunoa i ai le Afioga i le Minisita, ona o se faaiuga ua uma ona fai i ai le faaiuga a le Faamasinoga Maualalo. Ou te talitonu e le mafai ona toe suia le faaiuga lea a le Faamasinoga Maualalo vagana ua oo atu i le Faamasinoga lea o apili. Peitai

ane e i ai ni faamoemoe o nisi o aiga pei o ni sua fa matai, o ni fale foi ua sauni e fausia, ia ma isi lava mau mea o le a sauni atu ai, ae te i ua toe avatu le poloaiga le tumau lea. O lea la e fesiligia pea e lou nei tagata, o fea le mea e malosi o faaiuga ia?, o le faaiuga a le Faamasinoga Mauualalo po o le poloaiga le tumau lea ua toe avatu? O lea ua feteenai mea ia e lua. Ae a silasila foi i le faaiuga a le Faamasinoga Mauualalo i lalo lava o le faaiuga lea, lea o lo o faapea mai, o lenei faaiuga e mausali, e le mafai ona...

**Tofa Olo Fiti Afoa Vaai:** Lau Afioga i le Fofoga Fetalai o se mea e fia faamalamalama.

**FOFOGA FETALAI:** Malie le sui usufono se i tulai mai lava le sui usufono mo Salega.

**Tofa Olo Fiti Afoa Vaai:** Lau Afioga i le Fofoga Fetalai, faamolemole lau Afioga, na umi ona ou nofonofo ma ou matau atu po o le Minisita Lagolago lea o Faamasinoga, ona o lea e pei ua tali mai le Minisita Lagolago i matou lauga lea e fai atu.

**Susuga SEIULI UELIGITONE SEIULI:** Lau Afioga e solifono le sui usufono lea, o lea e fai atu lau lauga ae le i tofia.

**FOFOGA FETALAI:** Ia saunoa lau Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, e i ai lava sina vaega lea e tataua ona faamalamalama e le Malo, lea ua oo i ai le saunoaga a le sui usufono o le fuaina o fanua faale-aganuu leaga o i tonu lea e tele ai le vevesi ma tuuaia ai le faiga foi lele sa aumai e le Tulafono 2008. O le Tulafono lena o le 2008 e faapitoa lava i le resitalaina i le tolerance system o fanua tau papalagi.

Ae o le faaaogaina la mo fanua ia faale-aganuu i le resitalaina o tuaoi lea ua i ai le faamoemoe e sili ia ona aveese, faatulaga ese pea le vaega lena aua le toe faafefiloia i totonu i i, ona e manino lava le resitalaina o mea ia o fanua faaleaganuu i le tulaga o tuaoi ia e faamau lelei ai faaiuga ia a le Faamasinoga. Na o le faaiuga lava a le Faamasinoga lea e tau ai le iuga lea, lea e aumai i le saunoaga a le sui usufono lea na saunoa nei. O le taua lena ina ia manino tuaoi, ma o le ala foi lena e taua ai le mea lea o le fuataga o fanua, e tusa ai ma le faaiuga a le Faamasinoga, ia aua ne i toe feseetai ona o aga ia o tatou tuaoi. E tuaoi mai le isi ogalaau i le isi ogalaau, se i tulou lava le Maota. Ua ou tulai soo i mea nei i o matou foi tuaoi.

Ou te manatua i le tausaga 1975 faatoa ou matai ae kosi ai le tuaoi o Lealatele ma Siupapa i Saleapaga. Ia o upu sa fai ae tutu lava tama ia e toalua na o atu e maka le mea lea e faasino i ai lima o toeaia, mai le isi ogalaau tele lava la e tu, la e ua leai nei le ogalaau tele lena agai i le niu. Ona faatulaga ai loa lea i ina o le matou tuaoi. Ua leai nei la se ogalaau lena ua pala, a o la e mau lava faamaumauga na a le Ofisa o Faamasinoga. O lea la ua toe tulai mai feeseeseaiga i le taimi lenei, a o le mea la lena e taua ai mea o le finagalo lea o le Faamasinoga, e tataua ona fua tuaoi i luga o le faaiuga a le Faamasinoga e tamau ai. A toe tulai mai ni pefea i le lumanai, a o la ua mautu.

E i ai le faamasinoga a lo matou aiga sa fai i le tausaga 1994 i Saleaumua sa laga ai foi tuaoi. O le isi la tuaoi i le isi itu atu la i o i Tiavea, e sau a mai tai i le sami, a o le tuaoi, se i tulou lava, o le pou o le matou faleese ai ua atoa le 20 tausaga, a o lena foi pou o la e tutu mai lava. O au la na ou popole mai lava i te i ua fai le matou faamasinoga i le aso lea ae alu atu se isi ma se ili ili ai aveese le pou, ou usupo ai i le taeao ou te alu e vaai po o tu mai lava le pou lea ae ou alu atu o la e tu mai lava le pou. Ua leai nei la se faleese, o le pou o le matou faleese i Saleaumua, e sau lava mai tai le tuaoi, i le falea o le EFKS lea e i ai nei o le foai a le toaina o le matou aiga.

E ala ona ou taua mea ia leaga ua ou aafia ai, ua ou matauina ai aua o le tele lava o tatou e na o le lauga ai i i ae le i i ai i totonu o se faamasinoga ma vaai i mea ia i le maaleale tele o tuaoi nei e fai nei, e tatau ai ona fua e le au fuafanua ia ogatasi ma le faaiuga a le Faamasinoga. O le mea lena ou te faataua ai le saunoaga a le sui usufono e le mafai ona sese se mea, e le mafai ona sese le fuataga lea,

O lea la ua i ai le tofamamao foi i le Afioga i le Minisita, le Afioga i le Sui Palemia ina ia soia ia le toe tulai mai o ni vevesi i ia mea, fai lelei se resitala. O fanua ia faaleaganuu ma le o soo o le vaega foi lele o le SSIG ea po o le sa saiga ma le o soo avesese mea ia, leaga ua oo lava i tatou aiga ia e i fafo o faavalevlea atu ai lava i le faauigaina o Tulafono o lea e soalaupule atu i totonu o le Maota lenei, aemaise o lea e soalaupule e matai o le atunuu, tusia foi e matai o le atunuu, puipuia e matai o le atunuu.

Aua la le faatusalia maia tulafono a Niu Sila, e le o ni Maori la e faia le Malo o Niu Sila, aua foi le faatusalia maia Ausetalia e le o ni Aborigines e ana Ausetalia la e faia le Malo o Ausetalia. A o le Malo lenei, o lea e soalaupule matai o le atunuu o latou ia e vaai totoa i eleele aua o latou aiga, ma e le nofo foi se matai faavalevlea ma fai se faiga e faataape ai meatotino. O le tulai mai o le matai, o ia ua na o se leomea ua na o se leomea a le aiga, a uma atu foi ia alu ia ae tulai mai le isi leomea e vaai meaasina a aiga.

**FOFOGA FETALAI:** Malo faafetai. Masalo o lea ua manino le sui usufono lea o Malie faamolemole. O lea ua manino le saunoaga lea a le Palemia e uiga i tuaoi ia sa e finau mai ai.

**Susuga SEIULI UELIGITONE SEIULI:** Lau Afioga e le i uma lau lauga.

**FOFOGA FETALAI:** O le uiga o lau fai atu se i tau tuutuu mai luma le tatou Fono.

**Susuga SEIULI UELIGITONE SEIULI:** Ia o lea ua ou malamalama lau Afioga i le Fofoga Fetalai o lea ua faamalamalama mai e le Afioga i le Palemia o lea ua manino e le mafai ona fuaina se fanua tau Samoa se i vagana se faaiuga a le Faamasinoga pe 10,000 pe 50,000 eka le tele o lou fanua e le mafai lava ona fuaina. Ae peitai o lau mataupu lea o lea ua ou see ese ma le... o le poloaiga le tumau lea sa laga mai e le sui usufono mo Vaimauga lea ou te faaluaina foi se manatu, i le mea lea o le feteenai o se faaiuga foi lea ua uma ona faia e le Faamasinoga Mauualalo, ae toe avatu le poloaiga le tumau lea ina ia aua ne i faia le faamoemoe lea o se aiga o lea ua faamoemoe e fai. O lea la ou te toe fesiligia po o le a le mea malosi po o le faaiuga a le Faamasinoga po

o le poloaiga le tumau. A silasila foi lau Afioga i le Fofoga Fetalai i le faaiuga a le Faamasinoga Mauualalo, o lea e alu atu ai ma le faaupuga e pei foi lea i lalo o le faaiuga lea, o lenei faaiuga e mausali, e tumau, a solia e se isi, o lona uiga ua molia i le Tulafono pe faasala i se faasalaga e fia.

**FOFOGA FETALAI:** Malie le sui usufono se i... o lea o le a tali atu le Minisita i le...

**Susuga SEIULI UELIGITONE SEIULI:** O lea e le i uma lau lauga, ae a pe a faatali se i uma lau... o le a uma minute...

**FOFOGA FETALAI:** Se i faafofoga mai la le sui usufono lea o le a ou fai atu, se i faafofoga mai lava. Sa tatou i ai i le semina na faamalamalama le mea lea, a o lea o le a taumafai tatou te toe o lava e faamalamalama ma faamanino le finagalo o le sui usufono lea. O le uiga lena na ala ai ona fai le tatou semina e afio atu Ofisa Sili o Pulega o Matagaluega e fitoitonu i ai le tatou Fono, e faamanino ma faamalamalama a o lea o le a manao tatou te toe o lava e fai ia malie le finagalo o le sui usufono. E le faapena le faiga o le tatou Fono. O lona uiga la e manao tatou te fono i le vaiaso atoa lenei ma lena vaiaso. E toe ave le Tulafono lenei i le Komiti a le Palemene ona toe fai ai lea o nisi fuafuaga ma nisi faamalamalama. O le mea la lea, na ona faaiila mai o outou finagalo, aua o la e foi e finagalo le Malo e faamalamalama le tulaga lea faamolemole.

**Susuga SEIULI UELIGITONE SEIULI:** Lau Afioga i le Fofoga Fetalai, e le o umi sau faamatalaga na o sina faapupulaga lea e taumafai atu i ai e le pei o lauga a isi sui usufono ia toeitiiti oo i le 15 minute ae le taofia e lau Afioga. Ia ua uma foi, se i tali mai le Afioga i le Minisita. Faafetai.

**Afioga Hon FAAOLESA KATOPAU T.AINUU:** Lau Afioga i le Fofoga Fetalai, e pei ona saunoa le Palemia, o fautuaga uma nei sa momoli mai e le Komisi Faapitoa lea na fausia ai le Tulafono lenei. E le i momolia mai e se isi, o le Komisi Faapitoa na i ai le avanoa e o e sailiili ai ma aumai latou fautuaga, tusi ai le Tulafono lenei. A o lea foi ua faalogo atu, pei ua manatu eseele le tatou Maota... faaali mai le manatu o lea sui usufono mamalu, faaali mai le manatu o lea sui usufono mamalu, a o le Tulafono sa fausia i luga pei ona saunoa le Palemia. Na saunia i luga o le fautuaga a le Komisi. Ua ala ona ou taua le mataupu lea ona ne i te i ua faapea le tatou Maota ou te faapito i loa i totonu o Fanua ma Suafa. Leai, o fautuaga nei a le Komisi mamalu lea e faufau ai tatou Tulafono. E oo foi i le mataupu o soalaupulega, o fautuaga a le Komisi mamalu. Ae pei e sili lena o lea sa e saunoa e ave i le Komiti ona toe o foi lea faaali o latou manatu. Ma le faaaloalo lava.

**FOFOGA FETALAI:** Malo faafetai. Ia, se i tulai mai le sui usufono... Malie se i faamuamua i le sui usufono mo Faleata Sisifo leaga ua see lou vaa i le sui usufono mo Faleata Sisifo ona sosoo ai lea ma lau Afioga i le Aiga Malosi. Faapuupu mai le finagalo o Faleata Sisifo.

**Tofa LEALAILEPULE RIMONI AIAFI:** Faafetai tele lava i lau Afioga mo le avanoa. Finagalo malie foi lau Afioga faapea le Afioga i le Minisita, e laiti a nai mea ia e fia fautua atu ai, ona o Tulafono nei o Tulafono e aupito sili ona taua. E taua uma lava Tulafono a o le Tulafono lenei o Fanua ma

Suafa, ua leva foi ona tatou mafaufau i se suiga talafeagai, ae faafetai o lea ua tuuina mai e lau Afioga nai suiga ia ua aumai. E le tele ni manatu, ae i ai vaega ia e tatau ona toe tagai pea i ai. Muamua lau Afioga, faafetai o lea ua toe tuu i lalo tausaga o matai i le 21, faafetai i le vaega lea. A o le vaega lea e fia fai i ai se manatu, o le vaega lea o le toe aveeseina o suafa o matai o tagata. Manatua foi le mea lea na e saunoa nei i ai o le decision in rank. O se faaiuga matua maumausali e aafia ai tagata ma tagata e tutupu mai. O le mea lea e tulai mai, ua tuutalaloa tele le avanoa e toe aveese ai matai. Ne i te i ua avea ma tulaga e tele ai galuega a le tatou Ofisa, ae sa manaia lava le vaega lea sa i ai i lou talitonuga.

A toe tagai i ai lau Afioga i le Tulafono fou lea ua aumai, ua matua tatala le avanoa i sao ma aiga e faigofie ai ona toe aveese suafa matai. Ia manatua o mea nei o suafa matai e le faigofie le faaeina atu. Sa molia au ma nisi o lou aiga i le aveesega o mea ia o matai i le tausaga na mavae atu nei. O le mea la lea e fia fesoasoani atu ai i le tatou Matagaluega, a avatu ni mafuaaga e aveese ai se matai, e manino lava i le Tulafono mafuaaga e le mafai ona aveese, ae sa faaaauu lava le faamasinoga. Ona avatu lea fai le faamasinoga saunoa mai le faamasino, ia, e le mafai ona... alu alu le faamasinoga ua fia aso o fai, ae faapea mai le faamasino i le iuga na aumai, e tumau pea suafa matai o i latou nei ona e le o faamalieina le Tulafono i mafuaaga ia na aumai e le sui lea e aveese ai matai.

O le uiga la o lau faamatalaga, aisea na fai ai le faamasinoga? Aisea na faaaauu ai, alu ai le taimi o tatou, ua alu tupe? Manaia pe a na aumai lava e le Faamasinoga i le Ofisa o le Resitara, e le mafai ona faaaauu le tou faamasinoga e le o faamalieina matou i tou mafuaaga ua aumai e fai ai fua le faamasinoga. A o lea la ua aumai nei i le Tulafono, ua matua tele le tuutalaloa lea ua aumai nei, ua oo lava i le le tautua o le tagata ua mafai e le sao ona fai se tulaga e aveese ai. Ae sa manaia lava le mea na sau ai seiloga o se faasalaga i se Tulafono foi lea matuia ona mafai lea ona faatino i ai se faiga faapea.

O le vaega lea lau Afioga i le role a Faamasino Samoa, ona o lea ua aumai nei e le Tulafono le tofiaina o faamasino Samoa, o le latou sao, o le fautua, o le advisor, ave le fautua i le Peresetene po o le Sui Peresetene. O le fia malamalama lau Afioga, o lona uiga ua le toe i ai se malosiaga i Faamasino Samoa e fai ai se faaiuga, o le a faaoga na o Faamasino ia e lava lo latou tomai i Tulafono? O le isi vaega, ou te fia taua pea le vaega lea o le mediation leaga sa oo foi i ai le matou... afai e le o toe aoga lea vaega, e sili ona taatia, ae aumai se review, aua o lea ua matauina ua atoa le tausaga po ua lua tausaga o faatino lea vaega, po o i ai ni soligatulafono po o ni talosaga e talia ai le mea lea. I lou lava talitonuga, ou te le iloa i nisi o talosaga, a o talosaga lea e aafia ai matou, e leai ma se mea e tasi o soalaupule.

O le vaega lea lau Afioga i le 30 aso lea ua aumai i le iuga o Faamasinoga, se faafetai tele lava o le mea e tatau ona fai. Ae a pe a faaoo atu ai e le gata i le Faamasinoga lea o Fanua ma Suafa, ae fai foi i Faamasinoga lea i luga i le fale faamasino maualuga, Criminal Court, ave i ai, fai ma se Tulafono faapea ina ia faamalosi ai faamasino e fai a latou faaiuga i totonu o le 30 aso lea. E le tatau ona faia na o lalo i i, ae ave foi ma luga. Ma le faaaloalo lava.

Lau Afioga, o le isi au fesili, toe tasi lava lau Afioga i le Fofoga Fetalai, o le mea lea o le faamasinoga o talosaga, aua e pei o i lea faatoa faaoga ai loa. E leai e le toe fai atu se manatu, aua o lou foi manatu ou te auai i sui usufono ia sa saunoa nei, e leai se uiga e ala ai ona faaoga fua. A o le uiga o lau faamatalaga, ou te tuufesili pea i le mafuaaga e ala ai ona lua court of appeal.

O le tagata lava ia e le fia malamalama ma le fia... pe fia ni court of appeal e fai, e le mafai lava ona taliaina se soligatulafono. Manatua afai o le Tulafono lea o le talosaga muamua o lea e aafia ai faamasino ua i ai o latou tomai faapitoa a o lea e toe taumafai foi e toe ave i luga i isi... ia tailo i ai.

Ia ma le mea mulimuli lau Afioga, e fia oo lava sou manatu i le le mafai ona oo mai o le Faamasinoga iinei i le tatou Palemene, o tulaga mamalu ma tulaga faapena. Ia manatua foi, a valaau mai foi latou ia tatou tatou te o i ai ma tatou tutu i luma o le latou Faamasinoga. A o le mea lava e tataua ona fai, tataua ona fai le mea moni, mea sao. E tataua o le Highest Court i totonu o so o se atunuu temokarasi, o le Palemene. Ia, e le tataua ona toe tupu lea vaega. Ma le faaaloalo lava. Faafetai.

**FOFOGA FETALAI:** Tulai mai le sui usufono mo Safata.

**Afioga LEAANA RONNIE POSINI (Safata):** Lau Afioga i le Fofoga Fetalai, e fia faaali foi se manatu o lenei itumalo i le Tulafono Tau Faaofi. E muamua ona faafetai i le Afioga i le Minisita i le taua o le Tulafono ua aumai i luma o le Palemene. Ae i ai lava nai manatu laiti e taatia atu i lau Afioga i le Minisita se i e silasila i ai. O le mea lea ua ou matauina i totonu o le Faamasinoga lau Afioga i le Minisita, o mea ia o itu o le faamasinoga e aafia i totonu o se mataupu. Aua o lea ua i ai lava foi le matau e i ai faamasinoga e auai, ituaiga mataupu foi ia lea e taua pe na o se lua lava itu e tataua ona i ai i totonu o le faamasinoga, a ua o isi itu faafa mai a latou itu foi nei. Ae a silasila foi ma faitau i latou tala ia e aumai, po o se gafa po o se fanua, e tutusa lelei lava latou mau la e aumai i totonu e tutusa gafa, e tutusa uma lava, ona o le latou lea matau, a tele latou itu e tulai mai ona i ai lea o se iuga foi lea pei ua lilifa i ai le iuga a le Faamasinoga ae tulei le isi itu foi lele aua lava ne i au mai. Ia e silasila totoa ifo i ai lau afioga.

O le isi mea, o le a tele ai galuega a le Faamasinoga, o itu na e lua, a o lea o le a lima itu. O le mea foi la e tulai mai i le isi itu lea e tasi le itu, ua amata foi ona mafaufau foi lena itu, se i faalima la matou itu e sili atu i itu ia ua faafa a le Faamasinoga. O lea e tatalo atu ai ia silasila i ai lau Afioga i le Minisita, pe leai se avanoa i le Faamasinoga e tau faaitiitia ai itu faamasinoga i mea ia o Fanua ma Suafa.

Lona lua lau Afioga i le Minisita, o mea ia o faaiuga ia ua fai aua o lea e matau atu i le Tulafono lenei, e tolu lava faamasino latou te faafoeina mataupu a le Faamasinoga, ua le toe lima a o lea o le a tolu. E taua i lou lagona foi lele, o le taimi lea e lau ai iuga o faamasinoga foi lele, afai e le fulisia faamasino i se iuga foi lea, e le tolu e tutusa uma o latou manatu, e manaia pe a mau pea i faamaumauga le toatasi lea, o lea e le o au i isi faamasino ia e toalua. O le uiga foi lea o lau tala, mo le taimi e toe fai ai faamasinoga apili, aua e toe avatu i le Faamasinoga lea, a o la e autilotilo atu faamasino, o lea la e i ai le mafuaaga e ala ai ona toe apili le faamasinoga ona e i ai foi isi mafuaaga a isi faamasino lea e le o fulisia.

Ou te manatu e le toe oo sau tala i le mea lea o le poloaiga le tumau o lea ua saunoa i ai le tele o sui usufono o le tatou Maota. E pei ona ou fai atu, e feteenai loa poloaiga ia pei ona e saunoa foi i le taimi ua fano, e lua lava poloaiga, o le faia o le fale ma le le faia o le fale i luga o se fanua. Afai la e ave uma poloaiga ia e lua e fai le fale ae alu atu le isi poloaiga e le faia le fale, aua o lea na taua i le aso lea o le tatou semina, e leai se mea e noatia ai le talosaga i le mea lea o le poloaiga le tumau. E pei o lea ua ou tau faalogologo

atu, ia soloia loa na mea o poloaiga le tumau. O nai manatu ia lau Afioga i le Fofoga Fetalai. Ia manuia tele le Fono.

**FOFOGA FETALAI:** Tulai mai le sui usufono mo Anoamaa Sasae.

**Afioga ALAIASA MUAGUTUTIA MOEFFAAUOUO MALAGAITUTOGIAI SEPULONA MOANANU (Anoamaa Sasae):** Ia, pei lava o leae aofia i finagalo o isi sui usufono mea sa aafia e fia fai atu ai se manatu, ae o le tala a le isi toeaina ia te au, a e alu e te faipule, aua e te fiafia e te alu i le mea lea o le Faamasinoga, e tele lona aafiaga, e faaletonu ai lou tofi. Ae ui i lea, o le taua o lenei Tulafono e aafia uma ai le atunuu atoa, e aafia ai lota aiga ma aafia ai tupulaga o lalovaoa, o le lumanai o Samoa ma o tatou aiga.

Ia, o le mea lea ua faatulai mai, faapea e mafuli o le fautuaga a le Komiti. A ua vaavaai atu, pei ua avea le Komiti ua aumai ai se fautuaga, ua taugata atu mo le tatou atunuu le Tulafono lenei. O fuafanua, o loaia, o le mediator, o mea uma nei pei a atili ai ona tolotolo i tua le faiga o tatou faamasinoga, ae le vave aumai se faamoemoe ia maua ai se nofo lelei o aiga. Ona i ai lea o lou talitonuga pei ona taua e nisi sui usufono o le first appeal ma le court of second appeal, pe tatou te oo lava i le fifth appeal, e tuli lava e le isi tagata e taumafai e tuli po o le a le malosi ma le umi e taumafai lava e fai ina ia faaleaga ai le mea lea ua faataatia e isi faamasino. Ona i ai lea o le talitonuga, tatou te fiu lava e tulituli se mea moni, na o le Atua o lo o i ai le mea moni.

Ou te fia pai laitiiti i le mea lea na taua i le aveesea o le matai, e tatau ona i ai se timeframe faamolemole leaga o lea e sau o le sao o le aiga, so o se suli na aumaia le talosaga e aveese ai le suafa sao, ae tatau ona i ai se timeframe foi lea i sao ua tai sefulu tausaga, tai sefululima tausaga, ae sau lava so o se suli aumai le talosaga e aveese ai le sao, ia o nisi ia tulaga e tatau ona toe silasila i ai le tatou Tulafono. A o le aotelega o le Tulafono Tau Faaofi, e lagolagoina e lenei itumalo.

E faapea foi ona oo sau faamatalaga i le mea lea na le omai ai le Ofisa o Alii Faamasino i le tatou Palemene, ia aua tatou te popole i ai. O le malosiaga o tatou o le faia o Tulafono. O lea la ua tatou faia le Tulafono lea aua po o le a le tetee mai i ai, e malosi lava le mea lea o le a pasia atu e le Palemene o le fai o Tulafono ae faatino e latou. Ae faaleleia lo tatou va i ia Pulega e tolu pei ona taua, aua nei i ai se mea gase i le tatou nonofo ai. Ma le faaaloalo, ia manuia le tatou Fono.

**FOFOGA FETALAI:** Malo. Ia o le sui usufono mulimuli lea o Faasaleleaga Nu.4, tulai mai.

**Afioga PESETA VAIFOU TEVAGAENA (Faasaleleaga Nu.4):** Faafetai i lau Afioga i le Fofoga Fetalai. E le tele foi se manatu o lenei itumalo, ae na o le agaga faafetai i le Tulafono. Na pau lava lea o se vaega lau Afioga i le Minisita, o lea ua matauina i le aso lenei le taua o le tulaga lea ua aumai i le Tulafono, a o lea na saunoa le Palemia i le tulaga foi lea o le taimi i le fiu o aiga e faatali iuga o faamasinoga ua uma ona faia. O lea e avatu ai se talosaga i lau Afioga i le Minisita, e a pe a faaopoopo loa i ai ma le taimi, o lea ua tuuina atu le Tulafono i le taimi, tuu loa i ai ma le taimi, pe ono masina e tuuina atu e le Faamasinoga i aiga uma.

**Afioga Hon Faaolesa Katopau T. Ainuu:** Lau Afioga mo le faasaoina o le taimi, a lea ua i totonu o le Tulafono fou lea le 30 aso. Se i faitau foi lea i tatou Tulafono... Faafetai.

**FOFOGA FETALAI:** Malo. Ou te iloa o lea ua maea le saunoaga a le sui usufono, o lea ua tali le mea na...

**Afioga PESETA VAIFOU TEVAGAENA:** Lau Afioga i le Fofoga Fetalai, e moni o lea ua i ai le taimi, a o le tele o faamasinoga, e ese lava le aumai o le taimi i i ae o atu toe tolo. Pe le mafai ona i ai se isi Tulafono e sili atu ina ia tamau ai lava le iuga a le faamasinoga e le mafai ona toe toloa ona o le mafuaaga lenei, o le tele o aiga lea ua tapena atu. O le isi mea, e oo mai lava le valaau a le Atua i tagata o lo o taitaia a latou faamasinoga, e le i faia lava.

Ia, ona pau lea o se manatu lau Afioga i le Fofoga Fetalai.

**FOFOGA FETALAI:** Malo faafetai. Ia se i... O le sui usufono mulimuli la lea, o Alataua Sisifo, lau Afioga i le sui usufono.

**Afioga ALIIMALEMANU ALOFA TUUAU:** Faafetai i lau Afioga i le Fofoga Fetalai mo le avanoa, a o le tulai atu e fai sina sao o lenei itumalo o Alataua i Sisifo lau Afioga i le Fofoga Fetalai i le Tulafono. O le faatauaina o le Tulafono i le i ai lea o Faamasinoga ia e tolu. O le uluai suesuega, o le Faamasinoga o Talosaga faapea Faamasinoga Mauuluga. Ou te talitonu o le tulaga tonu i i o le faatau lea ma aloaia o le tulaga faapitoa o Faamasinoga a Samoa i fanua ma o tatou suafa matai. O lea la sa taua ai le tele o atugaluga i nisi o tulaga e pei o faafanua. O le tulaga lea i totonu ona o matou lea sa i le Komiti lea sa lauliliuina le tulaga lea i faamasinoga.

O le Tulafono lea e i ai e le o fai mai e aumai se ata faamaonia, o le sketch plan. Ina nei atugaluga ai ia sui usufono, e pei e pau lava le mea lea e manaomia e na o se ata faataitai, la e faasamoā mai i ina, ata tusi faataitai ina ia iloa e faamasino le fanua tonu lea e talanoa ai. Aua e leai se taimi o faamasino e o ai i tua i le taimi e aumai ai ia le mataupu, e vaai i ai i le tulaga lea. Ao le fuaina ia, e faatoa uma ona fua aloaia lea, mo le faaiuga pe a oo atu i ai.

O le tulaga foi i le soalaupuleina e pei ona i ai le atugaluga, o le finagalo lava o le atunuu, ina ia maua se faafesagaiga o le tele o aiga ma a latou mataupu. Leaga o le tele o mataupu e le mafai ona faafesagai itu e lua, ona o tulaga ia o le itu tagi ma le itu tetee. Ae pei e avea i, atonu o tatou i nisi itu e le taua ma e le i i ai ni iuga, na mafai ona faatino ai. Ao le tele o nisi aiga sa o latou matauina le taua o le soalaupulega lea, e faasoa faasoa lava ma toe talanoa le tuafafine ma le tuagane o aiga, e iu lava ina toe sologa malie se mataupu, o le aoga lena. Ao le tulaga i leí ..e le mafai ona faaaogaina ia totonu ia tatou tagata faigaluega i le Ofisa o Faamasinoga ona o le conflict of interest. Aua foi o latou e uma foi toe o i totonu o le Ofisa o Faamasinoga, toe faafoe le faamasinoga lea pe a latou o e soalaupule.

Ma le tulaga mulimuli e i ai se manatu e tulai atu ai, o le tofiaina lea o faamasino, e talitonu o lena ua i ai le Tulafono o lo o mulimuli mai, e faamatala auiliili ai ia tulaga uma. O le tala lea e faaopoopo atu ai ma le agaga faaaloalo, faafetai mo le avanoa.



**FOFOGA FETALAI:** Malo, o le a tuuina atu le avanoa Tulai mai le Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, matau ma le totoa au faaiuga ma lau tuualalo e le mafai na uma la tatou galuega, pe a fai au faaiuga ma toe tatala. O lau lea tuualalo lau afioga, e a pe a faamausali au faaiuga.

**FOFOGA FETALAI:** Malo faafetai. O le fesili pe a faitauina nei le Tulafono Tau Faaofi o Fanua ma Suafa 2019 i lona faitauga faalua.

*Na faamaonia le lafo ma faitauina le Tulafono Tau Faaofi o Fanua ma Suafa 2019 i lona faitauga faalua.*

**FOFOGA FETALAI:** E tusa ai ma Tulafono Tumau o le a tuuina atu le Tulafono Tau Faaofi i le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae mo le iloiloaina ma toe lipoti mai i le Fono Aoa o se Fonotaga o lumanai.

**TULAFONO TAU FAAOFI O TEUTEUGA O LE TULAFONO O LE FETUFAAIGA O FAAMATALAGA TAU LAFOGA 2019  
– faitauga faalua**

**FOFOGA FETALAI:** E tapa ma le faaaloalo lau Afioga i le Minisita.

**Afioga Hon TIALAVEA FEA LENIU TIONISIO HUNT:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Fetufaaiga o Faamatalaga tau Lafoga 2019 i lona faitauga faalua ma ou te fia tautala faamalamalama i ai.*

*Faaluaina e le Minisita mo Aoga, Taaloga ma Aganuu, Minisita o Tupe ma le Minisita mo Tina ma Tamaitai, Atinae o Nuu ma Afioga ma Agafesootai.*

**FOFOGA FETALAI:** Ou te tapa ma le faaaloalo lau Afioga mo le saunoaga faamalamalama.

**Afioga Hon TIALAVEA FEA LENIU TIONISIO HUNT:** Lau Afioga i le Fofoga Fetalai, o le Tulafono lenei e laititi lava. O le sini atu o teuteuga ina ia faatinoina tiute a Samoa i lalo o le maliega o atunuu aua le faatinoina o alafua mo le fetufaaiga o faamatalaga tau lafoga.

E na o le faaopoopoga lava o Korea i Sauté i le lisi e 13 o atunuu lea tatou te fai paaga i le fetufaaiga o faamatalaga. O le isi o le amataga lea o le tatou tax ma Niu Sila sa sainia i le 2015, e faapea e tolu masina e faigaluega ai o tatou .vaega ia e malaga atu i Niu Sila e le totogia ni lafoga. O le taimi lenei o lea ua ono masina, e pei o le feagaiga lea na sainia i le 2015 lea la o le a faamamalu nei i le Tulafono lenei pe a pasia lau afioga. E pau na o vaega pupuu o le Tulafono.

**FOFOGA FETALAI:** Manino le saunoaga faamalamalama a le afioga i le Minisita. Tatala le avanoa i sui usufono e fia saunoa, tulai mai

**Tofa OLO FITI AFOA VAAI:** Lau Afioga i le Fofoga Fetalai, e moni le saunoaga a le Minisita e laititi lava, ia o le a laititi foi se manatu. O lea e matau atu i le Tulafono lenei, e le o i ai le toatele o atunuu o le Pasefika, o tatou uso i i le Pasefika e tatau foi ona i ai le tulaga lea o le fetufaiga o faamatalaga. Ae sao o lea na o le lua atunuu lea ua i ai. O lona uiga a faaopoopo foi taeao po o lea vaiaso nisi atunuu toe aumai foi teuteuga lenei. Ao se fautuaga i lau Afioga i le Minisita ma le Matagaluega. E a pe a na o se faamatogi mai lava i le tatou Principal Act o atunuu ae fai ae i a outou lisi i le tou Regulation, e manino ai i ina. Aua e pei ona ou fai atu a toe faaopoopo foi le isi lua i le vaiaso lea, e toe aumai foi i le isi Fonotaga teuteuga o le Tulafono lea. Ma le agaga faaaloalo.

**FOFOGA FETALAI:** Malo faafetai. Tulai mai le sui usufono mo Palauli le Falefa. Malie se i tulai mai le Palemia.

**Susuga Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai. O le Tulafono lea o le Double Tax Agreement, e le o se Tulafono e faigofie ona taunuu i ai se maliega a se atunuu. O le agaga tonu o le Tulafono lea lau Afioga, o ni kamupani, o lea la e taua ai Niu Sila e faasino tonu i ni kamupani e o mai galulue i inei, afai e totogi a latou lafoga i inei, e le toe totogia e Niu Sila ia ni lafoga i luga o a latou tupe maua. Afai foi la e o atu ni a tatou kamupani e galulue i Niu Sila, ao lea e totogi i inei ia lafoga, e le toe totogia foi ni lafoga i le Malo o Niu Sila. E le faapea la o semea faigofie maliega a atunuu faapenei ona e le toe maua ai a latou tupe maua. Ao le taua o Korea i Sauté o le isi lea atunuu e ono toatele ni a latou faipisinisi e o mai e galulue, e faatu foi ni a latou pisinisi i Samoa nei, e pei o ni Pisinisi Tau Turisi, e maua ai galuega a o tatou tagata.

O le a la le lafoga e totogi i inei i le vaega lea o le latou pisinisi, e le toe totogia faalua i o i Korea. O le mafuaaga o le mea lea, e taua ai le Tulafono lea, e le tuu gofie i se atunuu ona faapea mai, ua lelei a o atu a matou pisinisi i ina maua a latou tupe i ina, e totogi lava a outou lafoga ae totogi foi i le atunuu o lea e i ai le Headquater. O mea la faapena o lea ou te toe faamalamalama atu, e le o se mea faigofie le mea lena. Afai loa e tali mai le atunuu tatou talia vave loa, aua o le taunuuga e aoga mo i tatou. E maua ai galuega mo a tatou fanau, ae afai e leai se mea lea, e le fia o mai foi ni kamupani i fafo i inei. O ai e fia sau pe afai e totogi lafoga i inei toe totogi lafoga i o, i le mea o la e i ai lo latou nofoaga autu. Lau Afioga i le Fofoga Fetalai, o le tali puupuu lena ua ala ai ona aumai faapea le Tulafono. E maua loa lava le avanoa e ioe mai ai lea Malo, i se ituaiga feagaiga faapenei, aumai loa i inei i le Palemene. Fai sia manuia ua maua.

**FOFOGA FETALAI:** Tulai mai le sui usufono mo Palauli le Falefa.

**Afioga Hon FAUMUINA TIATIA FAAOLATANE LIUGA:** Faafetai i lau Afioga i le Fofoga Fetalai, o le a ou le toe taua lea mea o lea ua manino lava le saunoaga a le Palemia i se tasi o vaega. O le Tulafono e laititi, ao le taua ia. E ala ona taua, ona e tasi lea ki e matala ai avanoa mo la tatou vaega lea o le SIFA, ona o la e pei e matau mai e isi atunuu ia e taumafai e titina a tatou pisinisi, o le le mafai ona tufa atu o faamatalaga i mea tau lafoga. Ou te

faafetai ai i le Afioga i le Minisita, aua o le Teuteuga o le Tulafono lea 2012, ua amata ai ona faateleina avanoa. E pei o le Tulafono lea, e le mafai ona cover ina ai atunuu e leai ni investors e o mai i inei. O atunuu o lea e aumai a latou tupe e faafaigaluega i totonu o Samoa, o le mafuaaga lena. Mo le silafia e lo tatou Palemene, o lo o taumafai nei, ina ia toe faafoi le vaega lea o le SIFA i le lisi paepae. E tasi lea vaega e pei e masalomia ai tatou o le faaufiufi o ni investors o omai e sulufai mai i inei, e natia ai a latou teugatupe ae le totogia lafoga.

Ou te faafetai ai i le Afioga i le Minisita e ona le Tulafono. Ma lou faaaloalo lava.

**FOFOGA FETALAI:** Malo faafetai.

*Na faamaonia le lafo ma faitauina le Tulafono Tau Faaofi o Teuteuga o le Tulafono o le Fetuaaiga o Faamatalaga tau Lafoga 2019 i lona faitauga faalua.*

**FOFOGA FETALAI:** E tusa ai ma Tulafono Tumau o le a tuuina atu le Tulafono Tau Faaofi i le Komiti o le Vaega tau Tamaoaiga mo le iloiloina ma toe lipoti mai i le Fono Aoao Faitulafono i se Fonotaga o lumanai.

#### **TULAFONO TAU FAAOFI O TEUTEUGA O LE TULAFONO O KOMISI O LE GAGANA SAMOA 2019 – faitauga faalua**

**Afioga Hon LOAU SOLA KENETI SIO (Minisita mo Aoga, Taaloga ma Aganuu):** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Komisi o le Gagana Samoa 2019 i lona faitauga faalua ma ou te fia tautala faamalalalama i ai.*

*Faaluaina e le Minisita mo Faatoaga ma Faigafaiva ma le Minisita mo Fesootaiga ma Faamatalaga Tekonolosi.*

**Afioga Hon LOAU SOLA KENETI SIO:** Lau Afioga i le Fofoga Fetalai, e puupuu lava foi ma saasaa le teuteuga e pei ona i ai le Tulafono o le Komisi o le Gagana Samoa 2014 i lona Tulafono Autu. E i ai ona mafuaaga autu lau Afioga i le Fofoga Fetalai na ala ai ona i ai ona teuteuga ia e faapena ona tuu i ai nisi o sui o le Komiti talu ai ona o le gagana o se tasi lea o vaega aupito sili ona taua ia te i tatou, this is our identity, o le tatou gagana.

Ua oo mai foi ia te au ma le Matagaluega nisi o fautuaga foi i nai o tatou uso i Niu Sila aemaise o Amerika Samoa ona e fia auai foi i lea Komisi. E taua foi ia i latou ona o lo o faapena ona aoaoina e le gata o Niu Sila a o Amerika Samoa le tatou gagana. O le taua ina ia sao ma anoa ma latou iloa ma mautinoa o le gagana lea o lea e faaogaina i totonu o si o tatou atunuu, o le a faapea foi ona latou aoaoina i alo ma fanau foi o lo o alaala ma aumau i Niu Sila aemaise o Amerika Samoa.

Na pau lava lea o nai Teuteuga lau Afioga, ole fuaiupu 3 lena e i ai le vaega 13(b) o le suiga o le 4i le fuainumera 5e mafai ai ona atoa le quorum e faatino ai le Komiti lea i a latou Fonotaga. O alauni foi o nei sui o le a faapena ona auai mai i le komiti lea, e totogi lava alauni masani o sitting allowance pe a fai a latou Fonotaga, a o isi alauni e totogi lava e latou pasese e auai mai ai, ma

nofoaga foi pe a faapea e nonofo i totonu o faletalimalo. A o le auga lava, ia sao ma lelei le gagana latou te faaaogaina i fafo, o le gagana o lo o faapena ona fausia atu i si o tatou atunuu.

*Na faamaonia le lafo ma faitauina le Tulafono Tau Faaofi o Teuteuga o le Tulafono o le Komisi o le Gagana Samoa 2019 i lona faitauga faalua.*

**FOFOGA FETALAI:** E tusa ai ma Tulafono Tumau, o le a tuuina atu le Tulafono Tau Faaofi i le Komiti o le Vaega tau le Va Fealoai mo le iloiloia ma toe lipoti mai i le Fono Aoa o se fonotaga i le lumanai.

Talu ai ona o lea ua tatou toai taunuu i le tatou malologa, e i ai le manatu o le a faagasolo le tatou galuega lea pe a tatou taliu mai i le tatou taimi toe amata o le afiafi. E i ai le manatu o le a faataatiaese Galuega a le Fono Aoa Faitulafono mo lana malologa seia aulia le itula e 7:00 i le afiafi.

*Na faataatia ese Galuega a le Fono Aoa Faitulafono i le itula e 11.07 i le aoauli ma toe faaauau ai i le itula e 7.00 i le po.*